

Be'ropí wa'aátehere Jesu Cristo Joãore werêka pũri niî'

A'ti pũri a'tĩro weéro ohâ no'opã niisê niî'

A'ti pũrĩre João s'ólo niî'ke pũrĩre ohâ'kita ohâki niîwĩ. Kĩî bu'ĩri da'rêro Patmo wamêtĩri nikiropi niĩgi, ohâki niîwĩ.

A'ti pũri Ô'âkĩ hi kĩî iá'karo nohota be'ropĩre a'tĩro weegĩsami niisêre wererĩ pũri niî'.

João kē'êgi weeró noho kĩî ì'yâ'kere ohâki niîwĩ.

Kĩî sete Jesu Cristore êho peóse kurarikâharã Ásiapi niirãre ohâki niîwĩ.

Jesu Cristo Joãore kē'esê weeró noho ì'yó'ke niî'

1 A'ti pũri be'ropi wa'aátehere Jesu Cristo wererĩ pũri niî'. Ô'âkĩ hi Jesu Cristore “Kã'roákã be'ro a'tĩro wa'ârosa”, niî ì'yóki niîwĩ. Kĩî Jesu Cristore êho peórãre teeré masĩ dutigi tohó werêki niîwĩ. Be'ró Jesu Cristo yi'ĩ João wamêtigĩre teeré weré turĩawĩ. Kĩî Ô'âkĩ hire weré ko'tegi ì'mĩsekĩ hi me'ra tohó weewĩ. Yi'ĩta Jesu Cristore da'rá wã'ya ko'tegi niî'.

²Yi'ĩ ì'yâ'ke niî pe'tisere werêgiti. Yi'ĩ ti'ó'ke kē'rare werêgiti. Ô'âkĩ hi uúkũ'kere Jesu Cristo yi'ĩre ãyuró werêwĩ.

³A'ti pũri ohâ'karo noho wa'aátoho kã'ró di'sá!. No'ó a'ti pũrĩre Jesu Cristore êho peórãre bu'êgi noho e'katĩse bokagĩsami. Tohó niikã a'ti pũri Ô'âkĩ hi o'ô'kere bu'ekã ti'orã pe'e kē'ra e'katĩse bokarãsama. No'ó naã a'ti pũripĩ ohâ'kere diakĩ hí weerã noho e'katĩse bokarãsama.

João Jesu Cristore êho peóse kurarikâharãre ohâ'ke niî'

⁴Yi'ĩ misã Ásiapi niirã sete Jesu Cristore êho peóse kurarikâharãre ohã!. Ô'âkĩ hi misãre ãyuró weeáto. Misãre ãyuró ti'ó yã'akã weeáto. Ô'âkĩ hi neê waropita niî'ki niĩmi. A'tóka tero kē'rare niî nu'kukã'mi. Be'ropĩ kē'rare opãturi a'tĩgisami. Ô'âkĩ hi wiôgi duhirĩ kumuro tiro sete Ô'âkĩ hire weré ko'terã bahutĩrã nu'kumã. Naã toopĩ nu'kurã Espĩrito Santore niî pe'tise tutuasê kiogĩ niĩmi, niî si'rĩrã weemã. Naã kē'ra misãre ãyuró weeáto. ⁵Tohó niikã Jesu Cristo misãre ãyuró weeáto. Kĩî Ô'âkĩ hi yeekãhasere keoró weregĩ niĩmi. Kĩĩta niî pe'tirã wēri'kãrã diporo masã mi'ta'ki niĩmi. Kĩî niî pe'tirã a'tĩ di'takãharã wiôrãre dutĩmi. Marĩre ma'ĩmĩ. Kĩî wēri'gi, kĩi yeé diĩ me'ra marĩ yã'ãro weé'kere yi'riówĩ.

⁶Kîî wêrisé me'ra marí wiôrá wa'âpâ. Tohô niiká Ô'âkî hi yeere da'rará sâhapá. Kîî pakí dutisére da'raato nígi maríre tohô weéki níwî. Kîî re âyuró e'katí peorá. Tohô tutuagí ní nu'kugisami. Tohôta niátô.

⁷Misâ ti'oyá. Ô'âkî hi besé'ki Cristo o'me kuráripí dihátigisami. Kîî a'tiká, ní pe'tirá î'yârasama. Tohô niiká kîî re wêhé'kârâpita î'yârasama. Ní pe'tirá a'tí di'takâhará kîî a'tiká î'yârâ, utîrâsama. Tohôta wa'ârosa'.

⁸Marí wiôgi Ô'âkî hi tutuâ yi'ri ni'kagi a'tîro ními: “Yi'íta ní mi'tagi, ní tiogipi ní!” Ô'âkî hi neê waropîta ní'ki ními. A'tóka tero kê'rare ní nu'kumi. Be'ropí kê'rare opâturi a'tîgisami.

João Jesu Cristore kê'esé weeró noho î'yâ'ke ní!

⁹Yi'î João misâ akawerégi weeró noho ní!. Misâ weeró nohota yi'î kê'ra pi'etí!. Marí ni'kâro noho Ô'âkî hi pô'ra ní!. Tohô niiká yâ'áro wa'aká, Jesu Cristo maríre wâkú tutuasere o'ômi. Yi'î Patmo wamêtiri níkiropí bu'fri da'rerí wi'ipi níwî. Ô'âkî hi yee kiti, Jesu Cristo uúkú'kere weresé bu'fri toopí níwî. ¹⁰A'tîro wa'âwi yi'î re. Ni'ká soorí nímí niiká Espírito Santo tutuaró me'ra kê'esé weeró noho î'yowí. Wâkútiro yi'î sê'lêma pe'e tutuaró uúkuká ti'owí. Kîî uúkuse coroneta putîro weeró noho bisí wi.

¹¹Kîî yi'î re a'tîro níwî:

—Yi'íta ní mi'tagi, ní tiogipi ní!. Ní pe'tise mi'î î'yasére ni'ká pûripi ohâya. Mi'î ohâ'kere Ásiapi níirá sete kurari Jesu Cristore êho peóse kurarikâharâre o'ô'oya. Naâ a'tikérâ níma: Éfesokâharâ, Esmirnâkâharâ, Pérgamokâharâ, Tiatirakâharâ, Sardekâharâ, Filadélfiakâharâ, tohô niiká Laodicéiakâharâre o'ô'oya, níwî.

¹²Kîî tohô uúkuká ti'ógi, yi'î noá níti? nígi, mahâmi î'yawi. Setepagi sí'ó'ose ouro me'ra weé'kepagire î'yâwi. ¹³Teepagi wa'teropí ni'ká masiré î'yâwi. Kîî su'tîro yoaróhore sâyâwî. Kîî kutîropí ouro me'ra weéka daare di'tewí.

¹⁴Kîî poári âyuró butisé poari níwî. Kîî kapêri pe'e pekâ me'e î hirí pô'ra weeró noho asiwí. ¹⁵Kîî di'pôkâri komé así pa'akihi pekâ me'epi î hiró weeró noho níwî. Kîî uúkuse pehe maári po'ê yaha a'mâ birose weeró noho bisí wi. ¹⁶Kîî diakí hí kâha amukâpi sete yôkoáre kiowí. Kîî iséropi ni'ká píhi wiorí píhire kiowí. Tii píhí pîa pe'eseri ise yohâka píhi níwî. Kîî diâpoa imí kohokí hi muhîpû ipítí asistéro weeró noho níwî.

¹⁷Kîî re î'yâ ikiági, wêrigí weeró noho kîî di'pôkâri tiro birí ke'akâti. Yi'î tohô wa'aká î'yâgi, kîî diakí hí kâha amukâ me'ra yâa peó, yi'î re níwî:

—Uítikâ'ya. Yi'íta ní mi'tagi, ní tiogipi ní!. ¹⁸Katí nu'kugi ní!. Too dipóropire wêriwî. Ni'kâroakâre katí nu'kukâ'. Yi'î masaré wêriwî duti masi!. Pekâ me'epi wa'â duti masi!. Âpêrâ kê'rare “Pekâ me'epi wa'âsome”, ní masi!. ¹⁹Mi'î î'yâ'kere, ni'kâroakâ níisére ohâya. Be'ropí mi'î î'yâatehe kê'rare ohâya. ²⁰Apêyere masá too dipóropi masí no'oya marí'kere werêgiti. Á'râ sete yôkoá a'tîro ní sí'rírâ weemá. Naâ yi'î re êho peóse kurarikâharâ wiôrá sí'orí níirá níma. Sete sí'ó'ose ouro me'ra weé'kepagi kê'ra a'tîro ní sí'rîro weé!. Teé tiikésepagi yi'î re êho peóse kurarikâharâ níma, ní sí'rîro weé!, níwî.

Éfesokâharâre ohâ'ke ní!

2 Jesu Cristo a'tîro níwî:

—Éfesokâharâ, yi'î re êho peóri kurakâharâ wiôgi sí'orí níigire a'tîro ní ohâya: “Yi'î sete yôkoáre diakí hí kâha amukâpi kió!. Tohô niiká sete

sĩ'óo'se ouro me'ra weé'kepagi wa'teropi sihá! ²Nĩ pe'tise misâ weesére yi'ĩ masi'. Misâ da'rasé, misâ wākũ tutuasere masi'. Tohõ niiká yã'áro weerãre misâ iatĩsere masi'. Misâ basi ápêrã naã niisétisere i'yã masi'. Naã 'Jesu Cristo bese kũũ'kãrã niĩ', niĩma. Tohõ niĩmirã, niĩtima. Tohõ weerã naãre i'yãrã, 'Niĩ soorã niĩma', niĩ'. Misâ naã tohõ weesére masi'. ³Yeekãhasere da'rãrã, misâ ipĩti pi'etĩwi. Misâ teé pi'etĩsere ni'kawĩ.

⁴Misâ äyuró weemíkã, apêye noho misãre werê nemo si'ri'. A'tĩro niĩ'. Misâ neê waro ma'ĩ ni'ka'karo weeró noho weé wee'. ⁵Tohõ weerã misâ neê waropi äyuró weé'kere weäkũya. Misâ yã'áro weé'kere bihã wetiya. Neê waropi niisétĩ'kereta weeyã taha. Misâ dika yuútikã, misa yaã kurakãhagi si'óo'kihire kô'ãgiti. ⁶Apêye misâ weesé pe'e äyũ niĩ'. Nicolaíta wamêtiri kurakãharã weesétisere misâ neê kã'roákã iã wee'. Yi'ĩ kê'ra teeré neê iã wee'.

⁷Espírito Santo Jesu Cristore êho peórãre uúkũmi. O'mê peeri kiorã kĩĩ uúkũsere ti'oyã. A'tĩro niĩ'. Yi'ĩ paki tiro äyuró Paraíso wamêtiropi ni'kãgi yukĩ gi niĩ'. Äyuró weé yi'ri wetirã êho peó du'utirã tigi dikãre ba'ã, katĩ nu'kurãsama", niĩ ohãya, niĩwĩ.

Esmirnakãharãre ohã'ke niĩ'

⁸Opãturi Jesu Cristo niĩ nemowĩ taha:

—Esmirnakãharã, yi'ĩ re êho peóri kurakãharã wiõgi si'orĩ niigi kê'rare a'tĩro ohãya: "Yi'ĩta niĩ mi'tagi, niĩ tiogipi niĩ'. Yi'ĩ wêrĩ masã'ki niĩ'. ⁹Niĩ pe'tise misâ weesére masi'. Misâ pi'etĩse, pahasé kiosere masi'. Tohõ pahasé kiomirã, pehé kiorã weeró noho niĩ'. Apêyere masi'. Ápêrã 'Judeu masa niĩ', niĩma. Tohõ niĩmirã, misãre yã'áro uúkũma. Naã Judeu masa waro niĩtima. Naã wãti yaã kurakãharã niĩma. ¹⁰Misâ pi'etiãtehere uítikã'ya. Wãti ni'karerã misã êho peósere du'u dutigi bu'ĩri da'rerĩ wi'ipi sãhakã weegĩsami. Misã yã'atikã piãmukãse nimirita pi'etĩrãsa'. Tohõ weemíkã, teé wêrĩrãpi tohõta êho peó yapatikã'ya. Yi'ĩ tiripi misãre katĩ nu'kukã weegĩti.

¹¹Espírito Santo Jesu Cristore êho peórãre uúkũmi. O'mê peeri kiorã kĩĩ uúkũsere ti'oyã. A'tĩro niĩ'. Keoró weé yi'ri wetirã êho peó du'utirã pekã me'epi wa'ãsome", niĩ ohãya, niĩwĩ.

Pérgamokãharãre ohã'ke niĩ'

¹²Jesu Cristo niĩ nemowĩ taha:

—Pérgamokãharã, yi'ĩ re êho peóri kurakãharã wiõgi si'orĩ niigi kê'rare a'tĩro ohãya: "Yi'ĩ piã pe'eseri ise yohãka pihi wiorĩ pihire kiogĩ niĩ'. ¹³Yi'ĩ misã niĩ pe'tise weesére masi' pe'okã'. Misa yaã maka Pérgamo kê'rare masi'. Tii makãpi wãtiã wiõgi dutiró kiosamĩ. Toopĩ niĩmirã, misã yi'ĩ re siru tuú nu'ku'. Yi'ĩ re êho peó du'u wee'. Sô'ó niĩka tero misa yaã maka wãti niirópĩre a'tĩro wa'ãkaro niĩwĩ. Antipa wamêtigĩ Ô'ãkĩ hi yeekãhasere keoró werêki niĩwĩ. Ápêrã kĩĩ re misã wa'teropi niigĩre wêhé kô'akãrã niĩwã. Tĩta kê'rare misã yi'ĩ re neê êho peó du'utiwi.

¹⁴Apêye misãre a'tĩro weresé kió'. Diporópi ni'kĩ Balaão wamêtigĩ niĩki niĩwĩ. Kĩĩ Balaque wamêtigĩre a'tĩro bu'èki niĩwĩ: 'Mi'ĩ Israel kurakãharãre yã'áro wee duti'ya', niĩki niĩwĩ. 'Naãre misã êho peógire o'ô'ke di'ire ba'ã duti'ya', niĩki niĩwĩ. Kĩĩ tohõ niikã ti'ógĩ, Balaque naã wêhé iã moro peo'ke di'ire Israel kurakãharãre ba'ã dutiki niĩwĩ. Tohõ niikã naã yã'áro a'me tãrã baha ke'atikã weéki niĩwĩ. A'tóka tero misã

wa'tero ni'karerã Balaão wee duti'ke nohore siru tuúma. ¹⁵ Apêye kê'rare ni'karerã yi'f yabisére a'tíro weemá. Nicolaíta wamêtiri kurakâharã bu'esére siru tuúma. Neê du'ú sî'ritima. ¹⁶ Tohô weerã ni' pe'tise misã yã'âro weesére bihã wetiya. Misã dika yuútikã, misã tiropi wa'ágiti. Yaa pihí wiorí pihí isêropi kiorí pihí me'ra misãre bu'iri da'rêgiti.

¹⁷ Espírito Santo yi'f re êho peórare uúkumi. O'mê peeri kiorã kîf uúküsere ti'oyá. Keoró weé yi'ri wetígi êho peó du'utigire maná wamêtise i'mî sekâhasere ekágsa!. Tohô niiká kîf re i tâ pee butirí peere o'ôgiti. Tii peépi masí no'oya marirí wamere ohã no'orosa!. Neê ni'ká teé wameré masísome. Tii peére kiogí di'akí masígsami”, ni' ohâya, ni'wí.

Tiatirakâharãre ohâ'ke ni'

¹⁸ Jesu Cristo ni' nemowí taha:

—Tiatirakâharã, yi'f re êho peóri kurakâharã wiôgi si'orí niigíre a'tíro ohâya: “Yi'f Ô'ákí hi máki kapêrire peká me'e i hirí pô'ra weeró noho kiogí ni'!. Tohô niiká yi'f di'pókari komé así pa'akihí weeró noho ni'!. ¹⁹ Ni'f pe'tise misã weesére masí pe'okã!. Misã ma'isé, êho peóse, a'mêri wee tamúse, wákú tutuasere masí!. Ni'kâroakãre misã neê waro weé'karo nemoró ayuró weerã weé!.

²⁰ Tohô niimikã, apêye misãre weré sî'ri!. A'tíro ni'!. Misã sô'ó niíko Jezabelre kô'á wee!. Koó 'Ô'ákí hi weré duti'kere weré turiago weé’, niímimo. Tohô niímigo, yi'f re da'rá ko'terãre ni' soosere bu'êmo. Naãre yã'âro weé, no'ó iaró a'me tãrá baha ke'atikã weemó. Tohô niiká wa'íkí di'ire, naã ye'êkire êho peóse o'ô'ke di'ire ba'aká weemó. ²¹ Tii nimípi koó yã'âro weé'kere bihã weti dika yuú dutimiwi. Neê dika yuú sî'ritimo. Koó yã'âro a'me tãrásere du'ú sî'ritimo. ²² Tohô weégi koó yã'âro weesére du'utikã i'yági, koóre do'atikã weegíti. Koó me'ra yã'âro weé a'me tãrãre ipíti pi'etíkã weegíti. ²³ Koó pô'rare wêrikã weegíti. Tohô weekã, ni' pe'tirã Jesu Cristore êho peóse kurarikâharã a'tíro niirásama: ‘Kîf masá ti'ó yã'asere masími’, niirásama. ‘Naã po'peapi wãkusére, ísá kê'rare masí pe'okã'mi’, niirásama. ‘Marí niisétisere keoró wapa yeégisami’, niirásama. ²⁴ Apêrã misã Tiatirapi niirã Jezabel bu'esére siru tuútirã, watiã wiôgi yeekâhase ya'yiósere masítirã noho pe'ere a'tíro niigíti: ‘Misãre apêye dutí nemosome. ²⁵ A'té di'akíre weeyá. Misã keoró weesétisere neê du'utikã'ya. Teé yi'f a'tirí kurapi weé nu'kukã'ya.’

²⁶ Keoró yi'f iaró noho weé yi'ri wetí êho peó du'utirã, tohõta weé yapatíkã'ya. Tohô weerãre wiôrá wa'aká weegíti. ²⁷ Yi'f paki yi'f re ni' pe'tise makarikâharã wiôgi sôróowí. Yi'f kê'ra naãre meharóta sôróogiti. Yarã a'tíro weerásama. Yã'arãre tutuaró me'ra dutírásama. Komegí me'ra bapãri di'í me'ra ye'êkeparire paã mitoro weeró noho naãre weerásama.

²⁸ Apêye kê'rare yi'f iaró weé nu'kugire a'tíro weegíti. Naãre si'orí niigí weeró noho niigísami. Yôkoáwí bo'rê ke'ari kura mihátigi weeró noho niigísami. ²⁹ Espírito Santo Jesu Cristore êho peórare uúkumi. O'mê peeri kiorã kîf uúküsere ti'oyá”, ni' ohâya, ni'wí.

Sarde wamêtiri makakâharãre ohâ'ke ni'

3 Jesu Cristo ni' nemowí taha:

—Sardekâharã, yi'f re êho peóri kurakâharã wiôgi si'orí niigíre a'tíro ohâya: “Yi'f sete Ô'ákí hire weré ko'terã bahutírãre kió!. Naã Espírito Santore ni'f pe'tise tutuasé kiogí niími, ni' si'rirã weemá. Tohô

niiká tiikérāta taha yōkoaré kió!. Nií pe'tise misâ weesére masí pe'okā!. Misâ 'Ō'ākī hi yeere āyuró weemá' nií no'orā nií!. Tohō niimirā, wērī'kārā weeró noho nií!. Kīi yeere neé weé wee!. ²Ti'o masíya. Misâ āyuró weesé pe'tíro weé!. Di'saseákāre āyuró weeyá. Misâ weesére a'tíro i'ya'. Ō'ākī hi i'yóropire misâ keoró weé wee!. ³Misāre bu'el'kere wākūya. Teeréta siru tuúya. Misâ keoró weetísere bihā wetiya. Tohō weetf'kā, yi'f yahagí weeró noho weegíti. Wākútiro misâ tiropi bu'iri da'rēgi wa'āgiti.

⁴Tohō niimikā, tii maká Sarde misâ wa'teropire pehēterākā āyuró weerá niíma. Naā ya'āro weesére i'ya kūu siru tuútima. Su'ti ū'iritirā weeró noho niítima. Āyuró weé'kārā nií yuurā, yi'f me'ra niirāsama. Su'ti butisé sāyarā weeró noho bu'iri marirā niirāsama.

⁵Āpērā k'era āyuró weé yi'ri wetirā ēho peó du'utirā noho su'ti āyuró butisé sâa no'orāsama. Katí nu'kuse kiorā naā wameré ohā ō'oka pūripi kiorā naā wameré neé koé no'osome. Koé no'oro noho o'ōrā, yi'f paki i'yóropire yi'f 'Naāre masí', niígiti. Meharóta kīi re weré ko'terā i'yóropi k'errare niígiti. ⁶Espírito Santo Jesu Cristore ēho peórare uúkūmi. O'mé peeri kiorā kīi uúkūserere ti'oyá", nií ohāya, niíwī.

Filadélfiakāharāre ohā'ke nií'

⁷Jesu Cristo nií nemowī taha:

—Filadélfiakāharā, yi'f re ēho peóri kurakāharā wiōgi si'orí niigire a'tíro ohāya: “Yi'f ya'asé moogí, diakí hí niigí nií!. Yi'f diporókí hi wiōgi Davi yaá sáwire kió!. Yi'f ni'kitá masá Ō'ākí hi tiropi wa'aká wee masí!. Āpērā wa'atikā k'errare wee masí!. Yi'f pāāokā, neé āpí bi'a masítimi. Bi'akā k'errare, neé āpí pāāo masítimi. Misāre a'tíro werēgiti. ⁸Nií pe'tise misâ weesére masí pe'okā!. Yi'f misāre pehé yeekāhāsere wereátehere kūūwi. Teeré wee masí!. Neé ni'kí teeré ka'mú ta'a masítimi. Misâ tutuātirā nií!. Tutuātimirā, yeé bu'esére āyuró yi'tí!. Yeekāhāsere āpērare uúkūrā, 'Kīi re masí", nií!. ⁹Āpērā a'tíro niísama: 'Judeu masa nií", niísama. Tohō niimirā, Judeu masa waro niítima. Nií soorā wātiā wiōgi yaa kurakāharā niíma. A'tíro weegíti naāre. Naāre misâ diporo ehā ke'akā weegíti. Yi'f tohō weeká, yi'f misāre ma'isére masirāsama. ¹⁰Misāre mehēkā wa'aká wākū tutua duti'kere keoró weewí. Tohō weégi nií pe'tirā a'ti nukúkākāharā pi'etúri kura misāre ko'tēgiti. Nií pe'tirā a'ti nukúkākāharāre de'ró ēho peómiti naa? niígi, naāre pi'etf'kā weegíti.

¹¹Maatá a'tígiti taha. Misâ keoró weesétisere neé du'utikā'ya. Misâ keoró weetirā, Ō'ākí hi misāre o'ō booka be'to, kīi 'Ō'ōgiti' nií'kere bahurió boosa!. Āpērare o'ō boosami. Tohō weerā keoró weé nu'kukā'ya. ¹²Āyuró weé yi'ri wetí ēho peó du'utirāre yi'f paki tiro kūūgiti. Naā kīi yaá wi'likāhase botāri weeró noho kīi tiro nií nu'kurāsama. Yi'f paki wameré naāpire ohāgiti. Kīi yaá maka wamé k'errare ohāgiti. Kīi yaá maka, apé ma'ma maká Jerusalé wamēti!. Tii maká i'mîsekāha maka nií!. A'ti nukúkāpi dihátirosa!. Yi'f k'era naāre yi'f wamé, ma'má ape wamé ohāgiti. ¹³Espírito Santo Jesu Cristore ēho peórare uúkūmi. O'mé peeri kiorā kīi uúkūserere ti'oyá", nií ohāya, niíwī.

Laodicéiakāharāre ohā'ke nií'

¹⁴Jesu Cristo nií nemowī taha:

—Laodicéiakāharā, yi'f re ēho peóri kurakāharā wiōgi si'orí niigí k'errare a'tíro ohāya: “Yi'f diakí hí uúkūgi nií!. Ō'ākí hi yee kítire keoró

werê nu'kugi nií'. Ô'âkî hi yi'í me'ra nií pe'tisere weewí. ¹⁵ Nií pe'tise misâ weesere masí pe'okâ. Yarâ niímirâta, âyuró êho peó wee'. Misâ êho peórâ waro niikâ, âyu boópâ. Yi'í re êho peótikâ, yâ'â nií boosa'. Yi'í re bu'í di'aki êho peókâ maa, tootâ yâ'â yí'ria'. ¹⁶ Misâ tohó weesere yabí yí'riasa'. ¹⁷ Misâ a'tíro uúkú: 'Pehé kió'. Nií pe'tise âyuró wa'â. Neê di'sá wee', nií'. Misâ neê tí'o masí wee'. Pahasé kiorâ waro weeró noho kapêri í'yâtirâ, su'ti marirâ weeró noho nií'. ¹⁸ Tohó weégi misâre níngiti. Misâ ouro pekâ me'epi í há apó'ke yi'í kiosere yê'êya. Pi'etimirâ yi'í re êho peórâ, ouro kiorâ weeró noho nií'. Teeré kiórâ, misâ pehé kiorâ ní'râsa'. Apêye kê'rare su'ti butisé yi'í kiosere sâyâya. Misâ teeré sâyakâ, bopôyase pe'tiá wa'ârosa'. Yi'rió no'o'kârâ ní'râsa'. Tohó niikâ kapêri piósé yi'í kiosere yê'êya. Misâ teé piôka be'ro âyuró í'yârâsa' taha. Yeekâhásere âyuró masí'râsa'.

¹⁹ Yi'í ma'irâ nií pe'tirâre tu'tí boo kure'. Naâ yâ'âro weesere du'u dutigi tohó weé'. Tohó weerâ yeekâhásere ipíti weé sí'riya. Misâ yâ'âro weé'kere bihá weti dika yuúya. ²⁰ Ti'oyá. Yi'í sâháa sí'rigi, ní'kí sopé pí'to písú nu'kugi weeró noho nií'. No'ó yi'í re tí'ógi, kíí me'ra nií dutigi páao sórogi nohore a'tíro weegíti. Kíí me'ra sí'orí e'katí, nií nu'kugiti. Kíí kê'ra yi'í me'ra meharóta weegísami.

²¹ Âyuró weé yi'ri wetí êho peó du'utirâre yi'í me'ra wiôgi duhirí kumuropi dípogíti. Yi'í marikâ, âyuró weé yi'ri wetí'ki yi'í paki me'ra wiôgi duhirí kumuropi nií'. Tohóta yi'í kê'ra naâre meharóta weegíti. ²² Espírito Santo Jesu Cristore êho peórâre uúkúmi. O'mê peeri kiorâ kíí uúkúsere tí'oyá", nií ohâya, nífwí.

I'mîsepi naâ Ô'âkî hire êho peósere í'yâ'ke nií'

4 Be'ró yi'í João i'mîsepi í'yâ morowí. Toopí ní'ká sope susukâ í'yâwí. Too dípóro coroneta putipihí putí'karo weeró noho bisí'kita taha uúkúwí. A'tíro níwí yi'í re:

—A'topí mihátia. Be'ró wa'aátehere mí'í re í'yogítigi weé', nífwí.

² Kíí tohó níka be'roakâ maatâ Espírito Santo tutuaró me'ra yi'í re i'mîsepire miáawí. Toopí wiôgi duhirí kumurore í'yâwí. Tii kumúropi duhigíre í'yâwí. ³ Kíí í tá pee pûúro así pa'ari pee weeró noho bahugí nífwí. Jasje ou sardónica í tá sô'akahá wa'terí pee weeró noho así pa'awí. Tii kumúro sumúthore ní'ká daa bu'ê daa ní mahami sitiawi. Pûuro ya'sarí daa esmeralda wamêtiri pee weeró noho así pa'awí. ⁴ Wiôgi duhirí kumuro tiropi vinte e quatro wiôrá duhisé kumuri nífwí. Teé duhisé kumuripire tiikérata taha wiôrá bikirá duhíwâ. Naâ su'ti butisére sâyâwâ. Naâ níki naâ dípopápire ouro me'ra weé'ke be'torire pesâwâ. ⁵ Ô'âkî hi wiôgi duhirí kumuropire bípô ya'baró weeró noho bahuwí. Tohó niikâ bípô paâro weeró noho pûuro bisí wi. Tii kumúro tiro sete sí'ó'ose tuturi nu'kuwí. Tee tutúri níkita taha Ô'âkî hire weré ko'terâ bahutirâ nífma. Naáta Espírito Santore tutuasé kíogi nífmi, nií sí'rírâ weemá. ⁶ Apêye kê'ra tii kumúro tiro diá pahírí maa weeró noho bahuró akostíro nífwí.

Tii kumúro sumúthopi âpêrá ba'pâritirâ katirá weeró noho bahurá nu'kuwá. Nií pe'tiro naâ diápoapi, naâ sê'êmapire kapêri kíó bi'awá. ⁷ Nií ni'tagi yaí pahigí sô'agí weeró noho bahuwí. Kíí be'rokí hi wekí weeró noho bahugí nífwí. Kíí be'rokí hi masí weeró noho diápoatigi nífwí. Kíí be'rokí hi aâ paki wií wâ'kagi weeró noho bahugí nífwí. ⁸ Nií pe'tirâ naâ níki seis wiisé kiowá. Naâ wiisé bu'i, naâ wiisé dokapi kapêri weeró noho bahusé pehé kiowá. Naâ imí kohore, yamíre a'tíro bisí nu'kuwá:

Ô'âkî hi marî wiôgi âyú butia'gi, yâ'asé moogí niîmi. Tutuâ yî'rigi niîmi. Kîîta niîmi neê waropîta niî'ki. A'tóka tero kê'rare niî nu'kukâ'mi. Be'ropí kê'rare opâturi a'tigisami, niîwâ.

⁹Wiôgi duhirí kumuropi duhigí, katí nu'kugire naâ ba'pâritirâ kîî niisétisere âyuró uúkú, e'katí peo, "Áyú!" niîwâ. ¹⁰Naâ tohó weesétiri niki sô'ó niîkârâ vinte e quatro wiôrá bikirâ kîî diporo ehâ ke'a mihawâ. Kîî katí nu'kugire êho peowâ. Kîî di'pôkâri tiropi naa yeé ouro me'ra weé'ke be'torire kûuwâ. Tohó niiká naâ vinte e quatro wiôrá bikirâ a'tîro niîwâ:

¹¹Ô'âkî hi îsâ wiôgi, mi'î âyú butia'gi niî'. Mi'îre âyuró uúkúro iá'.

Mi'î niî pe'tirâ yî'rióro âyú yî'rigi, tutuâ yî'ri ni'kagi niî'.

Mi'î niî pe'tisere weé'ki niî'. Mi'î iaró me'ra niî pe'tise niî'.

Teé mi'î iaró me'rata niî pe'tise weé no'okaro niîwi, niîwâ.

Ovelha wi'magí papéra tûrure pãâ masise niî'

5 Ô'âkî hi i'mîse wiôgi duhirí kumuropi duhîwî. Kîî ni'ká papéra tûrure diakî hí kâha amukâpi kiowí. Tii tûrú pí a pe'eseri ohâka tûru niîwi. Setetiri pi'râ bi'aka tûru niîwi. ²Wiôgi duhirí kumuro pi'to ni'kí Ô'âkî hire weré ko'tegi tutuagíre î'yâwi. Kîî tutuaró me'ra a'tîro sêri yâ'awi:

—Noa nohó a'ti tûrúre pãâo masiakîhi âyugí niîti?

³Neê ni'kí i'mîsepi niigí, a'ti nukúkâpi niigí, tohó niiká a'ti nukúkâ dokapi niigí tii tûrúre pãâ masitiwî. Tohó niiká neê kâ'ró tii tûrúre pãâ bu'eákîhire î'yâ no'oya mariwí. ⁴Yi'î João neê ni'kí tii tûrúre pãâ masitikâ, teé ohâ'kere bu'ê masitikâ î'yâgi, pûûro utîwi. ⁵Yi'î utirí kura ni'kí wiôgi bikí yî'îre niîwi:

—Toô kâ'rota utîya. Diporókî hi wiôgi Davi paramí niî turiagi âyuró weé yî'ri wetí tohawî. Kîî Judá yaá kurakî hí yaí sô'agi tutuagí weeró noho wiôgi niîmi. Kîî a'ti tûrúre pãâ masimi. Teé pi'râ bi'a'ke kê'rare pãâ masimi.

⁶Kîî tohó niika be'ro yi'î Cristo masa mihá'kire î'yâwi. Kîî ovelha wi'magí wêhé no'o'ki weeró noho bahuwí. Kîî wiôgi duhirí kumuro pi'to katigí nu'kuwí. Sô'ó niîkârâ ba'pâritirâ katirâ weeró noho bahurâ, tohó niiká wiôrá bikirâ wa'teropi nu'kuwí. Kîî sete kapé sa'ari kiogí niîwi. Tiikéseta taha kapêri kê'rare kiowí. Kîî kapé sa'ari tutuasé kiogí niîmi, niî sî'riro weé'. Kîî kapêri pe'e a'tîro niî sî'riro weé'. Kîî Espírito Santore kiómí. Tohó weégi niî pe'tisere, niî pe'tiropi niisere masí pe'okâ'mi, niîro weé'. ⁷Ô'âkî hi maki ovelha wi'magí weeró noho bahugí wiôgi duhirí kumuro pi'topi wa'âwî. Toopí wiôgi diakî hí kâha amukâpi kióka tûrure miîwî. ⁸Kîî tohó weeká î'yârâ, naâ ba'pâritirâ katirâ weeró noho bahurâ, tohó niiká vinte e quatro wiôrá bikirâ kîî di'pôkâpi ehâ ke'awâ. Naâ niki biá pí tese pakare kiowâ. Naâ niki ouro me'ra weé'ke paari bapârire kiowâ. Tee paári i'mî tihise i há morosere posetise paari niîwi. Teé i'mî tihise Ô'âkî hire êho peorâ naâ sêrisé niî', niî sî'riro weé'. ⁹Naâ Ô'âkî hi maki ovelha wi'magí weeró noho bahugíre apêye ma'má basasére basâ peowâ. A'tîro niîwâ:

Mi'î âyugí niî'. Mi'î a'ti tûrúre miî masi'. A'té pi'râ bi'a'kere pãâ

masi'. A'tîro niî'. Mi'î wêhé no'o'ki niîwi. Mi'î wêrisé me'ra,

mi'î diî me'ra niî pe'tirâ masá Ô'âkî hi yarâ niátio niîgi

wapa yeéki niîwi. Niî pe'tise kurarikâharâre, mehêká uúkûrâre,

niî pe'tiropi niirâre Ô'âkî hi yarâ wa'aká weéki niîwi.

Tohó weégi mi'î a'ti tûrúre miî masi'.

¹⁰ Ô'âkî hi yaräre wiôrã sãhaká weéki níwî. Tohô niiká Ô'âkî hi yeere da'rará sôrooki níwî. Nîi pe'tirokãharã dutîrãsama, nîi basãwã.

¹¹ Be'ró yîi i'mîsepi niirã Ô'âkî hire werê ko'terã pãharãre î'yãwî. Naã úuküsere ti'owî. Naã pãhará a'tîro weewã. Wiôgi duhirî kumuro sumútoho, tohô niiká ba'pãritirã katirã weeró noho bahurá, âpêrã wiôrã bikirã sumútoho nu'ku mahãmi sitiawã. Pãharã waro nîi yî'rio kehokã'wã.

¹² Tutuaró me'ra a'tîro niîwã:

Ovelha wi'magí naã wêhe no'o'ki äyugi waro niîmi.

Tohô weégi nîi pe'tirãre dutî masimi. Nîi pe'tisere

kio masími. Nîi pe'tisere masí pe'omi. Tutuagí niîmi.

Nîi pe'tirã “Äyú yî'riami” nîi no'ogi niîmi. Kîi Ô'âkî hi

asistése kioגי niîmi. Nîi pe'tirã kîi re e'katí peoma, nîi basãwã.

¹³ Be'ró âpêrã úuküse kê'rare ti'owî. Naã a'tikêrã niîwã. Nîi pe'tirã Ô'âkî hi weé'kãrã i'mîsepi niirã, a'tí di'tapi niirã, di'tã po'peapi niirã niîwã. Tohô niiká diã pahirî maapi niirã niîwã. Naã a'tîro basã peowã:

Wiôgi duhirî kumuropi duhigire nîi pe'tirã e'katí peoato.

Nîi pe'tirã kîi re “Äyú yî'riami”, niãto. “Asistése, tutuasé kioגי

niîmi”, niãto. Tohô niiká Ô'âkî hi maki ovelha wi'magí weeró

noho bahugí kê'rare tohôta e'katí peo nu'kukã'ato, niîwã.

¹⁴ Naã tohô niiká ti'orã, sô'ó niikãrã ba'pãritirã katirã weeró noho bahurã “Tohôta wa'aáto”, niîwã. Äpêrã vinte e quatro wiôrã bikirã ehã ke'a, kîi re katí nu'kugire êho peowã.

Ovelha wi'magí papêra tûrure pãã wã'ka'ke niî'

6 Be'ró Ô'âkî hi maki ovelha wi'magí weeró noho bahugí tii tûrú pi'rã bi'a'kere pãaká î'yãwî. Kîi pi'rã bi'a mi'ta'karo pããka be'ro ni'kí sô'ó niikãrã ba'pãritirã katisé kiorã nîi mi'tagi yaî pahigí sô'agí weeró noho bahugí úuküsere ti'owî. Kîi úuküse bipô paasé weeró noho bisí wi. A'tîro niîwî:

—A'tiã.

² Kîi tohô niika be'ro ni'kí cavalo butigire î'yãwî. Kîi bu'ipi pesagí ni'ká biê têhere kiowî. Äpêrã kîi re ni'ká be'to dipôapi pesarí be'tore peowã. Kîi wee nu'ku'karo weeró noho âpêrãre dokã ke'akã weégi wa'ãwî taha.

³ Be'ró Ô'âkî hi maki ovelha wi'magí weeró noho bahugí apêro pi'rã bi'a'karore pããwî taha. Kîi pãaká, ápí katisé kioגי wekí weeró noho bahugí nîi mi'tagi be'rokî hi úukûwî taha:

—A'tiã, niîwî.

⁴ Be'ró ápí cavalo sô'agí wihãawî. Kîi bu'i pesagire a'ti nukúkãpi niirãre a'mê wêhe dutigi o'ôo'wî.

—A'me kêese mariró niitkã'ato, niîwî. Masaré a'mê wêhekã weewí. Kîi re pahirî píhihore o'ôwî.

⁵ Be'ró taha Ô'âkî hi maki ovelha wi'magí weeró noho bahugí apêro pi'rã bi'a'karore pããwî. Kîi tohô weeká, ápí katisé kioגי masí weeró noho diãpoatigi úukûwî:

—A'tiã, niîwî.

Be'ró ápí cavalo yîigire î'yãwî. Kîi bu'ipi pesagí ni'kãro nikisé keoróre kiowî. ⁶ Katisé kiorã weeró noho bahurã wa'teropire ni'kí úukúkã ti'owî. A'tîro niîwî:

—Ba'asé a'tîro wapatírosa'. Ni'ká quilo trigo peeri ni'ká nîmi da'ra wapã ta'ase weeró noho wapatírosa'. I'tiã quilo cevada peeri ni'ká nîmi da'ra

wapá ta'ase weeró noho wapatírosa!. I'sê piritári ba'ase, tohó niiká i'sê dika koo vinho pe'tiká weetíká'ato, niúwī.

⁷Be'ró Ô'ákī hi maki ovelha wi'magí weeró noho bahugí apêro pi'râ bi'a'karore pããwī. Kīî pãaká, âpí katisé kiogí aâ paki wīi wã'kagi weeró noho bahugí uúkūkã ti'owí:

—A'tiá, niúwī.

⁸Be'ró âpí cavalore i'yâwi. Kīî buti wihigi niúwī. Kīî bu'i pesagí Wērisé wamêtiwī. Kīî be'ro âpí wēri'kārã naâ niirókī hipi siru tuú wã'katiwī. Ovelha wi'magí a'ti nukúkãkãharãre kã'roákã de'ka me'ra diharó wēhe dutígi o'ôo'wī. A'mê wēhese me'ra, ihá boasé me'ra, do'átise me'ra boã dutígi o'ôo'wī. Tohó niiká wa'íkĩrã, yaíwa me'ra masaré wēhe dutígi o'ôo'wī.

⁹Be'ró Ô'ákī hi maki ovelha wi'magí weeró noho bahugí apêro pi'râ bi'a'karore pããwī taha. Kīî pãaká, naâ Ô'ákī hire wa'íkĩrãre i hã moro peo wiarore i'yâwi. Too dokápi Ô'ákī hire êho peórã wēhé no'o'kãrã ehēri pō'rari niúwī. Naâ kīî're êho peóse bu'iri, tohó niiká Jesu Cristo yee kitire weresé bu'iri wēhé no'okãrã niúwã. ¹⁰Naâ tutuaró me'ra uúkūwã. A'tíro niúwã:

—Wiógi, âyú butia'gi, mi'î yã'asé moogí nií'. Mi'î “Weegíti” nií'kere keoró weé!. De'ró niiká mi'î nukúkãkãharã i'sãre wēhé'kãrãre bu'iri da'rê a'megisari?

¹¹Be'ró naãre su'ti butisére o'ôwī. A'tíro niúwī:

—Soó ni'iya yuhûpi. Âpêrã misã akawerérã Jesu Cristo yeere wererã misã weeró noho wēhé no'orãsama. Misã soorãsa!. Teê “Tiikérãre wēherãsama” nií'ke wa'akápi soorãsa!, niúwī.

¹²Be'ró Ô'ákī hi maki ovelha wi'magí weeró noho bahugí apêro pi'râ bi'a'karore pããwī taha. Kīî pãaká, di'tã pũtro nara sãáwi. Muhîpũ imí kohokĩ hi na'í ti'a wa'ãwī. Wēri'kãrãre bihã wetirã su'ti yíisé sãyãro weeró noho wa'ãwī. Muhîpũ yamíkĩ hi di' weeró noho pũtro sô'ãwī.

¹³Yókoã kē'ra i'miãropi nií'kãrã nukúkãpi birĩ dihawã. Naâ yuki diká wi'masé weeró noho wa'ãwã. Yuki diká marikã wĩ'ró pũtro wēekã, birĩ diha!. Tohó weeró noho wa'ãwã. ¹⁴I'mi se marĩ papérare tũrêro weeró noho bahu dutiã wa'ãwī. Nií pe'tise i'ripagí, opa nikĩri apé sia'pi wa'ãwī. ¹⁵A'ti imí kohokãharã wiôrã i'tã tutiripi du'tiwã. Tohó niiká i'ripagí kãhase i'tã paã pakase dokapi du'tiwã. Âpêrã kē'ra pehé kiorã, surãra wiôrã, tutuarã, da'rã ko'terã, da'rã ko'tetirã du'tiwã. ¹⁶Naâ i'rigĩre, i'tã paãre niúwã:

—I'sã bu'i birĩ pehaya. Wiógi duhirĩ kumuropi duhigí i'sãre bu'iri da'rêgi weemí. I'sãre ka'mú ta'aya. Ovelha wi'magí kē'ra i'sãre ipiti bu'iri da'rêgi weemí. Ka'mú ta'aya. ¹⁷Masaré bu'iri da'reãtihi nimi nií toha!. Noã pōo tēo boosari teeré? nií karíkūwã.

Israel yee kurarikãharãre Ô'ákī hi wamere yãa kũú'ke nií'

7 Ô'ákī hi maki ovelha wi'magí weeró noho bahugí teé pi'râ bi'a'kere pãaká i'yãka be'ro apêye i'yâwi. Ba'pãritirã Ô'ákī hire weré ko'terã a'ti nukúkãpire ba'pãritise sumúthoripi nu'kuká i'yâwi. Naâ niki wĩ'ró naâ tiro ehásere ka'mú ta'awã. Tohó weéro wĩ'ró di'tãpire, diã pahirĩ maãpire, yukipagí bu'ipire wēéotiwi. ²Âpí Ô'ákī hire weré ko'tegi kē'rare i'yãwi. Kīî muhîpũ mihãtiro pe'le a'tiwi. Kīî Ô'ákī hi katĩ nu'kugi wamé yãa kũúrore kiowí. Á'rã ba'pãritirã di'tãre, diã pahirĩ maãre dohórê' duti no'okãrã niúwã. Kīî naãre karíkūwã:

³—Di'tâ, diâ pahirí maare, yukipagíre dohórê'tikâ'ya yuhúpi. Marí wiôgíre da'rá ko'terâre naâ diâpoopi kíî wameré yâa kúúka be'ropi dohórê'ya, niîwî.

⁴Cento quarenta e quatro mil masa Israel paramerã niî turiase kurarikâharã naâ diâpoopi yâa kúú no'owã. ⁵Judã yaá kurakâharã doze mil ohã yâa kúú no'owã. Rubén yaa kurakâharã doze mil yâa kúú no'owã. Gade yaa kurakâharã kê'ra doze mil yâa kúú no'owã. ⁶Ãpêrã Aser yaa kurakâharã doze mil yâa kúú no'owã. Naftali yaa kurakâharã doze mil yâa kúú no'owã. Manassé yaa kurakâharã doze mil yâa kúú no'owã. ⁷Tohô niiká Simeão yaa kurakâharã doze mil yâa kúú no'owã. Levi yaá kurakâharã doze mil yâa kúú no'owã. Issacar yaa kurakâharã doze mil yâa kúú no'owã. ⁸Zebulô yaa kurakâharã kê'ra doze mil yâa kúú no'owã. José yaá kurakâharã doze mil yâa kúú no'owã. Benjami yaa kurakâharã kê'ra doze mil yâa kúú no'owã. Niî pe'tirá naa yeé diâpoaripire yâa kúú no'o'kãrã di'akí niîwã.

Su'tí butisé sâyarã pâharã Ô'âkí hi diakí hi nu'kusé kiti niî'

⁹Israel yee kurarikâharãre yâa kúú no'oka be'ro a'tíro í'yâwi. Pâharã masã niî pe'tise kurarikâharã, mehêkã uúkürã, niî pe'tirokâharãpire í'yâwi. Naâ wiôgi duhirí kumuro diakí hi, tohó niiká Ô'âkí hi maki ovelha wi'magí weeró noho bahugí diakí hi nu'kuwã. Pâharã waro niîwã. Neê ba'pã beota basiótiwã. Naâ su'tí butisére sâyã, pürí opa keérire kiowã. ¹⁰Naâ karikúwã:

Ô'âkí hi marí wiôgi maríre yi'riógi niîmi. Kíî wiôgi duhirí kumuropi duhími. Ô'âkí hi maki ovelha wi'magí weeró noho bahugí kê'ra maríre yi'riógi niîmi, niî karfkúwã.

¹¹Niî pe'tirá Ô'âkí hire weré ko'terã wiôgi duhirí kumuro sumútopi nu'ku mahãmi sitiawã. Tohó niiká sô'ó niikãrã wiôrà bikirãre, ãpêrã katisé kiorã weeró noho bahurãre mahãmi sitiawã. Naâ Ô'âkí hire weré ko'terã wiôgi duhirí kumuro tiro ehã ke'a, Ô'âkí hire êho peórã naâ diâpoarire paã mu'ri ke'awã. ¹²A'tíro niîwã:

A'tíro wa'aáto marí wiôgíre. Niî pe'tirá kíîre êho peoáto.

“Asistégi, masí pe'ogí niîmi”, niíáto. Niî pe'tirá “Ayú yi'riami”, niî e'katí peoato. Niî pe'tirãre dutími. “Tutuã yi'rigí niîmi”, niíáto. A'té tohóta niî nu'kuato. Tohóta niíáto, niî êho peówã.

¹³Ni'kí wiôgi bikí yi'íre sêrí yã'awí:

—Á'rã su'tí butisé sâyarã no'okãharã niíti? No'opí a'tiãpari? niîwî.

¹⁴Yi'íre kiíre yi'tiwi:

—Wiôgi, mi'í masísa!

Kíî pe'e yi'íre niîwî:

—Á'rã nukúkãkãharã pũuro pi'etika terore naã kê'ra pi'etí'kãrã niîma. Naâ Ô'âkí hi maki ovelha wi'magí weeró noho bahugí wêrisé me'ra naã ehêri põ'rariipi yã'asé moorã tohãkãrã niîwã. ¹⁵Tohó weerã naã Ô'âkí hi duhirí kumuro tiro niî nu'kukã'ma. Kíî yaá wi'ipire imí kohori níki, yamíri níki kíî iaró weemã. Wiôgi duhirí kumuropi duhigí naã me'ra niîmi. Naãre ko'têmi. ¹⁶Naã ihã boã, ako wió nemosome. Naãre muhípú imí kohokí hi í há nemosome. Asisé yãisére tí'ó yã'a nemosome. ¹⁷Ô'âkí hi maki ovelha wi'magí weeró noho bahugí wiôgi duhirí kumuro pi'topi niigí ovelhare ko'têgi weeró noho naãre ko'têgisami. Akó wiharí peepi miãagisami. Teeré sí'rírã, katí nu'kurãsama. Ô'âkí hi niî pe'tirá naã ya'ko koó wiharãre tuu koégisami.

Papéra tūrure naâ pi'râ bi'a tio'ke kiti, tohō niiká ouro me'ra weékaga i hâ moro peokaha kiti nií'

8 Be'ró Ô'âkî hi maki ovelha wi'magí weeró noho bahugí naâ pi'râ bi'a tio'karore pãawî. Kîî pãaká, nií pe'tiro i'mîsepi di'ta mariá wa'áwi. Ni'ká hora deko tohō wa'áwi. ²Be'ró sete Ô'âkî hire werê ko'terã kîî pi'to nu'kuráre i'yáwi. Naâre naâ niki putisé coronetare o'ôwî. ³Be'ró âpi Ô'âkî hire werê ko'tegi a'tîwî. Kîî i'mîtihise i hâ morokaha ouro me'ra weékagare kiowî. Kîî Ô'âkî hire wa'îkîrã i hâ moro peo wiaro pi'topi ehâ ni'kawî. Pehé i'mîtihise kîîre i hâ moro peoatehere o'ôwã. Nií pe'tirã Ô'âkî hi yarã kîîre sêrî'ke me'ra moré su'u i hâ moro peoatehere o'ôwã. Kîî ouro me'ra we'karo i'mîtihise i hâ moro wiaropi wiôgi duhirí kumuro diakî hi teeré i hâ morowî. ⁴Kîî i hâ morose i'mîtihise o'mé Ô'âkî hi tiropi miháwi. Ô'âkî hi yarã kîîre sêrî'ke me'ra moré su'u mihawi. ⁵Be'ró Ô'âkî hire werê ko'tegi i'mîtihise i hâ moro wiaropikãhase pekã me'e i hâ moa'kere i'mîtihise i hâ morokahapi ôre sãawî. Be'ró tigakãhãse a'ti nukúkãpire po'o dihówî. Kîî tohō weéka be'ro bipô paaká, ipíti bisisére tí'owî. Bipô ya'baká i'yáwi. Tohō niiká di'tã nara sãawî.

Ô'âkî hire werê ko'terã coroneta putiátehe nií'

⁶Be'ró sete Ô'âkî hire werê ko'terã naâ coroneta putisére apo yuúwã.

⁷Nií mi'tagi putiwî. Kîî putíka be'ro yisiáse peeri a'ti nukúkãpire birî dihawi. Tohō niiká pekã me'e dií me'ra moré'ke birî dihawi. Tohō wa'aká, di'tã kã'rô deko boo kure i hî wi. Yukipagí k'ra meharóta deko boo kurepita i hî wi. Nií pe'tise taã i hî pe'tia wa'áwi.

⁸Kîî be'rokî hi putiwî. Kîî putíka be'ro ni'kãgi i'rigí i hikihí diã pahirí maahopi doke yôo no'owi. Tii maã deko boo kure dií maa wa'áwi. ⁹Diã pahirí maakãharã deko boo kure wêrîwã. Yukîsipawi k'ra tii maãpi niisé deko boo kure mirí i hâ kô'a no'owi.

¹⁰Be'ró, piárã be'rokî hi putiwî. Kîî putíka be'ro yôkoáwî pahigí i'miãrokî hi birî dihawî. Birî dihagi, si'óori tuturoho weeró noho i hî dihawî. Kîî diãpire, ô'ô maha maariakãpire deko boo kure doké bi'pe ke'awî. ¹¹Yôkoáwî "Sî'egí" wamêtiwî. Akó a'ti nukúkãkãhase kîî doké ke'a'karo ehã tu'aro akó si'esé wa'áwi. Teé akoré si'rîrã, pâharã masã wêrîwã.

¹²I'tiárã be'rokî hi putiwî taha. Kîî putiká, muhîpû imî kohokî hi deko boo kure paã no'owî. Tohō wa'aká imî koho deko boo kure na'í tí'a wa'áwi. Muhîpû yamiki hî, yôkoá k'rare tohõta paã no'owã. Tohō weerã yamîpire deko boo kure bo'rê yuutiwã.

¹³Be'ró i'yáwi taha. Ni'kí aã paki a'ti imí koho dekopî wiiká i'yáwi. Tutuaró me'ra a'tiro niíwi:

—Âpêrã i'tiárã Ô'âkî hire werê ko'terã putiká, yã'ã butia'ro wa'ãrosa' a'ti nukúkãkãharãre, niíwî.

9 Ba'pãritirã be'rokî hi putiwî. Kîî putiká, ni'kí yôkoáwî nukúkãpi birî diha'kire i'yáwi. Kîîre ni'ká sãwi o'ôwã. Kopê nií bahu dutí dihari peekãha sãwi niíwi. ²Be'ró kîî tii peére pãawî. Pããoka be'ro o'mé paka wihawî. Tii peékãhase o'mé muhîpûre tuú bi'akã'wi. Na'í tí'a wa'áwi. ³Teé o'mé me'ra pâharã mi'mîri wi'ia wii wiháwã. Nií pe'tiropi wií se'sa wa'áwã. Naã mi'mîri wi'ia a'ti nukúkãkãharã kutîpa weeró noho toãwã. Naã siipãpire kutîpa weeró noho toakahá kiowã. ⁴Naãre taãre,

otesére, yukipagíre dohorê' dutigi meheta weewí. Masá naê diápoapi Ô'âkî hi wamé yâa kûu no'oya marirá di'akîre toâ dutiwí. ⁵Naâre toâ wêhe dutitiwí. Ni'kâmukâse muhipûri naâre pûriká wee dutiwí. Naâ toasé kutípa weeró noho pûrfwi. ⁶Tohó wa'arí kurare masá ipíti wêri sî'rimiwá. Naâ wêri sî'rimiká, basiótiwi.

⁷Mi'mîri wi'ia cavaloa a'mê wêheatoho diporo apo yúu'kârâ weeró noho bahuwá. Naâ dipopápi ouro me'ra weé'ke be'tori weeró noho bahusére pesáwâ. Naâ diápoa masí diápoa weeró noho bahuwí. ⁸Naâ poârire numiâ weeró noho poâ ni'motiawá. Naâ upíkari yaí upíkari weeró noho bahuwí. ⁹Naâ ipiré ka'mú ta'arâ, komé su'ti weeró noho bahusére kiowá. Naâ wiiká, ipíti bisî wi. Masá a'mê wêherá wa'ârâtirâ, cavaloa wehesépawi wa'âro weeró noho bisî wi. ¹⁰Naâ siipápi toasé kiosé me'ra ni'kâmukâse muhipûri masaré toâwâ. ¹¹Mi'mîri wi'ia wiôgi niî bahu dutí dihari peeho wiôgi niîmi. Kîíta tii peére pââwí. Kîî wamé hebreu yee me'ra Abadó wamêtiwí. Grego yee me'ra Apolió wamêtiwí. Dohorê'ri masí niîmi, niî sî'riro weé'.

¹²Niî mi'tase yâ'asé pe'tí'. Piáro di'sá'.

¹³Ni'kâmukârâ be'rokî hi putiwí. Kîî putiká, ni'kí uúkúkâ ti'owí. Ô'âkî hi niirópi Ô'âkî hire i'mî tihise i há moro peo wiaro ouro me'ra weé'karo niîwi. Toó bu'ipi ba'pâritise kapé sa'ari niîwi. Teé wa'teropi Ô'âkî hi uúkúkâ ti'owí. ¹⁴Kîî coroneta putigíre a'tíro niîwí:

—Ba'pâritirâ Ô'âkî hire weré ko'terá di'té ni'ko'kârâre pâaya. Naâ pahiri maaho Eufrate wamêtiri maa pi'to niîma, niîwí.

¹⁵Kîî tohó niika be'ro a'rá pââ no'owâ. Naâ ba'pâritirâ Ô'âkî hire weré ko'terá niî pe'tirâ a'ti nukúkâkâharâre deko boo kurepi wêherá wa'âwâ. Naâreta Ô'âkî hi a'tíro weéki niîwí. “Tíi hora, tii nimí, tii muhípû, tíi kí'ma niiká, misâ bu'iri da'rêrasa!” niî bese kúuki niîwí. Keoró kîî ni'karo noho wa'âwi. ¹⁶Naâ me'ra pâhará surára cavaloa me'ra niîwâ. Naâre pâhará waro duzentos milhões niîma niisére ti'owí.

¹⁷Cavaloa, tohó niiká naâ bu'i pesará a'tíro bahuwá. Naâ bu'i pesará naâ kutírore ka'mú ta'asere sô'aró, ya'saró, ewí ro kiowá. Cavaloa naâ dipopáre yaiho weeró noho dipopátiwâ. Naâ iséropi pekâ me'e i hî wihawí. O'mé wihawí. Tohó niiká enxofre wamêtise opê weeró noho sipisé i hî wihawí.

¹⁸Teé i'tiá pekâ me'e, o'mé, enxofre me'ra masaré deko boo kure wêhewá.

¹⁹Cavaloa naâ isêri me'ra, naa yeé pikori me'ra masaré wêhewá. Naa yeé pikori yapari âyâ dipoa weeró noho bahuwí. Teé me'ra masaré dutí da'rewâ.

²⁰Âpêrâ masá pekâ me'e, o'mé, enxofre me'ra wêritirâ pe'e naâ yâ'âro weesére neê du'utiwâ. Naâ wâtiâre êho peósere du'utiwâ. Naâ êho peóse yeé'ke ouro me'ra weé'ke, prata me'ra weé'ke, bronza me'ra weé'ke, i'ta peeri me'ra weé'ke, yukipagí me'ra weé'kere êho peó du'utiwâ. Teé yeé'ke naâ êho peóse pehé neê i'yâti, neê ti'otí, neê síhâ wee'. Tohó niîmiká, neê êho peó du'utiwâ. ²¹Tohó niiká masaré wêhé kô'asere, naâ âpêrâre dohorê'sere du'utiwâ. Apêyere, naâ no'ó iaró a'me târá baha ke'atisere, âpêrâ yeere yahasére neê du'utiwâ.

Ô'âkî hire weré ko'tegi papéra turiakâ me'ra nu'kusé niî'

10 Be'ro âpi Ô'âkî hire weré ko'tegi tutuagí i'mîsepi niî'kire dihátikâ i'yâwi. Kîî o'me kurá dekopi dihátiwí. Kîî dipôa bu'i bu'ê daa niîwi. Kîi yaá diápoa muhípû imí kohokí hi weeró noho asistêwi. Kîî yêkâri i hisé botari weeró noho bahuwí. ²Kîî amúkâpi papéra pâaka turiakâre

kiowí. Kîî diakî hí kâha di'pôkâre pahirí maahopi i'ta kûú nu'kuwî. Kûúpe! pe'ere di'tâpi i'ta kûú nu'kuwî. ³Kîî toopí nu'kugí yaiho weeró noho pûuro karíkûwî. Kîî karíkûkâ, sete bipoâ uúkûwâ. ⁴Naâ uúkûka be'ro naâ uúkûsere ohâ ni'kamiwi. Tohó weerí kura ni'kî i'mîsepi niigi yi'î re niîwî:

—Naâ bipoâ uúkûsere âpêrâre werêtikâ'ya. Ohâtikâ'ya teeré, niîwî.

⁵Be'ró yi'î diâ pahirí maapi, di'tâpi nu'kukâ ÿ'ya'kî kîi yaâ diakî hí kâha amukâre sîo morowî. ⁶Kîî a'tîro niîwî:

—Ô'âkî hi katî nu'kugi niîmi. I'mîse, di'tâ, pakasé maari niî pe'tirâ teepí niirâre wee'ki niîmi. Ô'âkî hi wamé me'ra niîgiti. Marí yuú kue'ke pe'tiâ wa'â'. Yuú kue nemosome. ⁷Ô'âkî hire weré ko'tegi niî tiogi putí ni'kari kurare a'tîro wa'ârosa!. Ô'âkî hi “Tohó weegíti” niî'ke masí no'oya mari'ke wa'â bakeo'rosa!. Kîî, kîi yeé kiti weré mi'tarâre “A'tîro weegíti” niî'ke keoró wa'ârosa!, niîwî.

⁸Kîî tohó niîka be'ro i'mîsekî hi yi'î re “Ohâtikâ'ya” niî'ki a'tîro niîwî:

—Sî'í, maahópi, di'tâpi i'ta kûú nu'kugi tiropi wa'âya. Kîi yaâ turi pâaka turiakâre mîya, niîwî.

⁹Kîî tohó niîká ti'ógi, yi'î kîî tiropi wa'âwi.

—Mî'í yaâ turire o'ôya, niîwî. Yi'î sêrikâ ti'ógi, a'tîro niîwî:

—Mî'íya. Tii pûrire ba'âya. Mî'í ba'akâ, mumiâ mumi weeró noho i'pîtirosa!. Mî'í paâgapi pe'ere sîesé dohorósa!, niîwî.

¹⁰Kîî tohó niîká ti'ógi, yi'î tii turiakâre miîwî. Miî, ba'âwi. Yi'î ba'akâ, mumi weeró noho i'pítiwi. Paâgapi pe'ere sî é niîkâti. ¹¹Be'ró Ô'âkî hire weré ko'terâ yi'î re niîwâ:

—Ô'âkî hi kîî uúkûsere weré apogi wa'âya taha. Kîî pehe makârikâharâre, pehé di'takâharâre, mehêkâri uúkûrâre naa yeekâhasere werêmi. Teeré werêgi wa'âya. Tohó niîká wiôrâ kê'rare “Ô'âkî hi tohó niîami”, niî werêya, niîwâ.

Piârâ Ô'âkî hi yeekâhasere wererâ wee'ke niî'

11 Be'ró yi'î re a'tîro weewâ. Ârîgi wi'í weerâ keokihí weeró noho bahukihîre o'owâ. Ô'âkî hi yi'î re a'tîro niîwî:

—Ô'âkî hi wi'ire keógi wa'âya. Naâ i'mî tihise î hâ moro êho peó wiaro kê'rare keoyá. Toopí êho peorâ kê'rare ba'pâ keoya. ²Ô'âkî hi wi'í sumútoho maa keotíkâ'ya. Teé apé sia'kâharâre o'ô'ke di'tâ niî'. Naâ quarenta e dois muhipûri Ô'âkî hi yaa maka Jerusalé di'tare dohoré' nu'kurâsama, niîwî.

³Be'ró Ô'âkî hi niî nemowî taha:

—Piârâ yarâ, yeekâhâsere wererâre o'ôo'giti. Naâ pehé imî kohori, mil duzentos sessenta nîmiri yeekâhâsere uúkûrâsama. Naâ bihâ wetisere ÿ'yórâ naâ wee wiaro noho su'tí wâkisere sâyâ, uúkûrâsama, niîwî.

⁴Â'râ piârâ yukîpagí oliveira wamêtisepagi weeró noho niîma. Teé piâgi oliveirapagi Ô'âkî hire da'râ ko'terâ niîma, niîro wee!. Naâta taha piâga si'ôo'sepa weeró noho niîma. A'ti nukúkâkî hi wiôgi Ô'âkî hi ÿ'yóropi si'ôo' nu'kuma. ⁵Âpêrâ naâre mehêkâ wee si'rikâ, naâ isêropi pekâ me'e î hî wihasama. Naâre ÿ'ya tu'tirâre î hâ kô'a pe'okâ'sama. Tohó weerâ niî pe'tirâ naâre mehêkâ wee si'rîrâ noho wêrisama. ⁶Naâ Ô'âkî hi yeekâhasere wererí kurare akóro pehâtikâ wee masísama. Tohó niîká akoré diî weeró noho dohokâ wee masísama. Apêyere, masaré no'ó niisé noho yâ'âro wa'akâ wee masísama. No'ó naâ wee si'rîro wee masísama. ⁷Naâ, naâre weré duti'kere weré tu'a ehaka be'ro ÿ'yâ bahu dutí dihari peekí hi yâ'agí

naê me'ra a'me kээ́gisami. Naâre doká ke'aká weé, wêhé kô'agisami. ⁸Naâ piára yee ipire masá naê siharópi pahiri makahopi kúúrāsama. Tii makáho Jesu Cristore naê wêhéka maka nií'. Tii makákāharā yā'arā nií tīharā, Sodomakāharā, Egitokāharā weeró noho niíma. ⁹I'tiá nimi ape nimí deko nií pe'tise makarikāharā, nií pe'tise kurarikāharā naa yeé ipire i'yārāsama. Tohō niiká nií pe'tirā mehékari di'akí uúkūrā, nií pe'tise di'takāharā naa yeé ipire i'yārāsama. Teeré yaa dutísome. ¹⁰Naâ Ô'ákí hi yeere wererá pi'e kíoro masaré tí'ó yā'aká weékārā niíwā. Tohō weérā a'ti nukúkāpi niirá naa wērí'kere i'yārā, e'katrāsama. Naâ ipíti e'katírā, a'méri apéye noho o'órāsama. ¹¹I'tiá nimi ape nimí deko be'ro Ô'ákí hi naâre masowí taha. Naâ wā'ká ni'kaká i'yārā, masá ipíti ikiáwā. ¹²Ni'kí i'mísepi niigí naâre tutuaró me'ra a'tíro niíwí:

—Mihátia.

Kíí tohō niiká tí'órā, naê o'me kurá me'ra mihāawā. Naâ mihāakā, naâre i'yā tu'ti'ikārā i'yāwā. ¹³Naâ mihāari kura di'tá pūuro nara sáawi. Tii makápire pehé wi'seri birí dihawí. Pāhará sete mil masá wéríwā. Apérā di'sá'kārā ipíti uírā, “Ô'ákí hi i'mísepi niigí tutuá yí'ri ni'kami”, niíwā.

¹⁴Piáti yā'áro wa'á toha! Maatá apéro wa'á bakeo'rosa! taha.

Ô'ákí hire weré ko'tegi kíí putí tio'ke nií'

¹⁵Ô'ákí hire weré ko'tegi nií tiogi putiwí. I'mísepi niirá tutuaró me'ra naâ uúkūkā tí'owí. A'tíro niíwā:

Ni'károakāre Ô'ákí hi marí wiôgi nií pe'tirā a'ti nukúkākāharā wiôgi sāhamí. Kíí besé'ki Cristo tohōta sāhamí.

Kíí dutí nu'kugisami, niíwā.

¹⁶Tohō wa'asére i'yārā, sō'ó niikārā vinte e quatro wiōrā bikirá a'tíro weewá. Naâ wiōrā duhisé kumuri Ô'ákí hi diakí hi duhirá kíí tiro ehā ke'awā. Kííre êho peórā, naâ dipopāre paá mu'ri ke'awā. ¹⁷A'tíro niíwā:

Ô'ákí hi, ísā wiôgi tutuá yí'ri ni'kagi, mi'íre “Áyú!” nií'.

Mi'í neé warokí hi, be'rokí hí, a'tóka tero kē'rare nií nu'kugi nií'.

Mi'í tutuasé me'ra ni'károakā wiôgi sáhā ni'ka'.

Nií pe'tirāre dutí ni'ka'. Tohō weérā mi'íre “Áyú!” nií'.

¹⁸Nií pe'tirā a'ti nukúkākāharā mi'íre jatírā uāmiwā. Mi'í naâre bu'íri da'reri nimi ehā'. Tohō niiká wérí'kārā kē'rare bu'íri da'reri kura nií'. Ni'károakāre nií pe'tirā mi'í yarāre wapa yeégisa'. Mi'í yeékāhasere weré turiarāre wapa yeégisa'. Wio pesásé me'ra mi'íre êho peórā wiōrāre, mehō niirāre wapa yeégisa'.

A'ti nukúkākāharāre dohórē'rā kē'rare kō'arí nimi nií', niíwā.

¹⁹Naâ tohō niika be'ro Ô'ákí hi wi'í i'mísepi niirí wi'í sopé pāriwi. Tii wi'í po'peapire ni'ká akaro niíwi. Tii akáro Ô'ákí hi “A'tíro weegíti masá me'ra” nií, kíí ohāka pihire kíorí akaro niíwi. Tohō wa'áka be'ro bipô ya'baká i'yāwi. Bipô paasére, tohō niiká mehékā bisisére tí'owí. Di'tá pūuro nara sáawi. Akó yisiásé bitisé peeri birí wi.

Numio yeé kiti, tohō niiká pīró weeró noho bahugí yee kiti nií'

12 Be'ro i'miáropi mehékā bahusé paka bahuákā i'yāwi. Ni'kó numiôre i'yāwi. Koô muhípū imí kohokí hípi omá bi'a'karo weeró noho asistéwō. Muhípū yamíkí hi bu'ipi nu'kuwó. Koô dipôapire ni'ká be'to pesawó. Tii be'to doze yōkoá kiowí. ²Koô nihí pako niíwō. Koô wiaátoho diporoaká pūri no'ogo ipíti karíkūwō. ³Be'ro i'miáropi mehékā bahusé

ĩ'yâwi taha. Ni'kí pĩrô weeró noho bahugí sô'agí hore ĩ'yâwi. Kĩĩ sete dipopá kiowí. ⁴Kĩĩ pĩkóro me'ra de'kô boo kure i'mísepi niirá yôkoäre paaste dihowí. Kĩĩ numiô pō'ratíkã, maata ba'ágiti nígi, koô tiro nu'kuwí. ⁵Koô ni'kí wi'magí wiâwô. Kĩĩta nií pe'tirokáharã wiôgi niíákíhi niíwí. Tutuaró me'ra masaré naäre dutiákíhi niíwí. Kĩĩ bahuáka be'ro maata Ô'ákí hi tiro kĩĩ wiôgi duhirí kumuropi miáa no'owí. ⁶Numiô pe'e masá marirópi Ô'ákí hi apó'karopi du'tiwó. Toopí koôre pehé mil duzentos sessenta nímíri ba'asé ekawá.

⁷Be'ró i'miáropi a'me kēése wa'âwi. Ô'ákí hire werê ko'tegi Miguel wamêtiagi apêrã kĩĩ yarã Ô'ákí hire werê ko'terã me'ra pĩrohó tohó niiká pĩrô me'rakáharã me'ra a'me kēewí. ⁸Pĩrô pōo tēóti, dokã ke'akã weé no'owí. Kĩĩre tohó wa'áka be'ro kĩĩ yarã me'ra i'mísepi naã niiró bokatiwã. ⁹Ô'ákí hi pĩrôre kō'ákã'wí. Kĩĩta neé warokí hi pĩrô nií no'o'ki ními. Kĩĩ wãtiã wiôgi ními. Nií pe'tirãre a'ti nukúkãkáharãre mehêkã êho peókã weegi ními. Ô'ákí hi kĩĩre, kĩĩ yarã me'ra nukúkãpi kō'ã dihowí.

¹⁰Tohó wa'áka be'ro ni'kí i'mísepi niigi tutuaró me'ra uúkú dihokã ti'owí. A'tiro niíwí:

Marĩre yĩ'riöse nií toha'. Ô'ákí hi tutuasére, kĩĩ marí wiôgi niisé nií toha'. Kĩĩ besé'ki Jesu Cristo tutuasé me'ra kĩĩ wiôgi niisé kē'ra nií toha'. Ô'ákí hi wãtĩre i'mísepi nií'kire a'ti nukúkãpi kō'ã dihowí. Wãtĩ imí kohori niki, yamĩri niki a'tiro weewí. Ô'ákí hipire werê sãagi, marí akawerã Ô'ákí hi yarãre “Yã'áro tohó weemã”, nií nu'kuwí.

¹¹Ô'ákí hi yarã marí akawerã wãtĩre dokã ke'akã weewá. Naã Ô'ákí hi maki ovelha wi'magí weeró noho bahugí wērisé me'ra, kĩĩ yéé dií a'mã birose me'ra tohó weewá. Naã katĩri imí kohore ma'itĩrã, Ô'ákí hi yee kitire weresé me'ra kĩĩre tohó weewá. Apêrã naäre wēhé sĩ'rikã, naã werê du'utiwã. Wērisére útiwã.

¹²Wãtĩre kō'asé bu'ĩri Ô'ákí hire werê ko'terã, nií pe'tirã i'mísepi niirã, e'katĩya. Nukúkãpi, diã pahĩri maakáharã maa yã'ã butia'. Wãtĩ misã tiropi uã dihami. Kã'roákã yĩ'ĩre di'sã' bu'ĩri da'reátoto nígi, tohó weemí, niíwí.

¹³Pĩrohó nukúkãpi kō'akã ĩ'yãgi, wi'magí wiã'kore niriwí. ¹⁴Ô'ákí hi pe'e koôre aã paki wiisé pakare o'ôwí. Teé me'ra koô pĩrohóre du'tígo, wií wã'kawô. Koô masá marirópi du'tiwó. Toopí Ô'ákí hi i'tiã ki'ma apé ki'ma deko koôre ba'asé ekawí. ¹⁵Be'ró pĩrô diahó dohó, koôre mii biriató nígi kĩĩ iséropi akoré o'ô kúuwí. Koô numiôre a'mã biro dutigi tohó weewí.

¹⁶Kĩĩ tohó weekã, di'tã koôre wee tamúwi. Pĩrô kĩĩ o'ô kúuse diahó dohosere si'bi sãhakã weewí. ¹⁷Tohó wa'akã ĩ'yãgi, pĩrô numiô me'ra uã yĩ'ria wa'âwi. Be'ró koô paramerã nií turiarã me'ra a'me kēégi wa'âwi. Naã Ô'ákí hi dutĩ'kere weerã Jesu Cristo yee bu'esére êho peó nu'kurã níma. ¹⁸Pĩrohó pahĩri maa sumútopi ehã ni'kawí.

Piãrã mehêkã bahurã yee kiti nií'

13 Diã pahĩri maa sumútopire ni'kí mehêkã bahugí wã'ká pa'awí taha. Kĩĩ kē'ra sete dipopá kiowí. Apêyere piámukãse kapé sa'aritiwí. Kĩĩ kapé sa'ari niki pesasé be'torire kiowí. Kĩĩ dipopãpire Ô'ákí hi yabisé wameré ohã o'ô no'owí. ²Kĩĩ yaí weeró noho do'rôwí. Kĩĩ

bikó weeró noho di'pôkâtigi niîwî. Kîî pahigí yaí weeró noho isêrotiwî. Pîrô kîî re kîî tutuasêre o'ôwî. Kîî re yâ'arâ wiôgi duhirí kumuropi dipowî. “Masá mi'î dutisêre yi'tiáto”, niîwî. ³Ni'ká dipoapire yâ'arí kamiroho wâ'yáro weeró noho bahuwî. Yatíka kamiro weeró noho niîwî. Tii kamírore i'yârâ, a'ti nukúkākāharā wêrî masá'kire weeró noho kîî re i'yâwâ. Ipíti i'yâ maria, kîî re siru tuúwâ. ⁴Masá pîrô kê'rare êho peówâ. Kîî mehêkâ bahugíre masaré dutí masisere o'osé bu'iri tohó weewá. Mehêkâ bahugíre êho peórâ, a'tîro niîwâ:

—Neê ârî weeró noho tutuâ yi'rigi marimí. Neê ni'kí kîî me'ra a'me kée masitisami, niî êho peówâ.

⁵Pîrohó mehêkâ bahugíre a'tîro uúkúkâ weewí: “Yi'î niî pe'tirâ yi'riôro niî”, niî uúkúkâ weewí. Tohó niiká Ô'âkî hi yabisêre uúkúwî. Pîrô kîî re “Quarenta e dois muhîpuri masaré dutígi wa'âya”, niîwî. ⁶Kîî dutí'karo nohota weewí. Ô'âkî hire yâ'áro uúkú, kîî wameré, kîî niiró i'mîsepire yâ'âro uúkúwî. Tohó niiká i'mîsepi niirâ kê'rare yâ'áro uúkúwî. ⁷Apêye kê'rare pîrô Ô'âkî hi yarâ nukúkâpi niirâ me'ra kîî re a'me kée dutigi o'ôo'wî. Naâ me'ra a'me kée dokâ ke'akâ weewí. Kîî re niî pe'tise kurarikāharāre, niî pe'tise di'takāharāre, niî pe'tise makarikāharāre, mehêkâ uúkūrāre dutí masisere o'ôwî. ⁸Niî pe'tirâ a'ti nukúkākāharā mehêkâ bahugíre êho peówâ. Naâ, naâ wameré Ô'âkî hi maki ovelha wi'magí weeró noho bahugí wêhé no'o'ki yaa pûripire ohâ ô'o no'oya maríkarâ niîwâ. Tii pûri a'tí di'ta weé ni'kari kura katisé kiorāre ohâ ô'o no'oka pûri niîkaro niîwî.

⁹O'mê peeri kiorá a'teré ti'oyá. ¹⁰“Bu'iri da'reri wi'ipi sôroo no'orāsama” niî no'o'kārâ tohóta sâháarāsama bu'iri da'reri wi'ipi. “Di'pîhihó me'ra wêhé no'orāsama” niî no'o'kārâ tii pîhí me'rata wêhé no'orāsama. Tohó wa'arí kurare Ô'âkî hi yarâ wākú tutuaya. Ô'âkî hire êho peóya.

¹¹Be'rô âpí mehêkâ bahugíre i'yâwi taha. Kîî di'tâ po'peapi niî'ki mihátiwî. Kîî ovelha wi'magí weeró noho piá sa'aro kapé sa'aritiwî. Kîî uúkúse pûrikâ pîrohó weeró noho bisí wi. ¹²Kîî mehêkâ bahugí yaí weeró noho bahugí dutisêre kiowí. Kîî yaí weeró noho bahugí kamíroho yatí no'o'kire a'tîro wee basáwî. Niî pe'tirâ a'ti nukúkākāharāre kîî re êho peókâ weewí. ¹³Be'rô kîî basi pe'e mehêkâ bahusé paka weé i'yowî. Masá i'yoropi pekâ me'e i'miáropi niî'kere di'tâpi dihátikâ weewí. ¹⁴Kîî re tutuasé o'ô'ke me'ra yaí weeró noho bahugíre mehêkâ bahusé paka weé i'yowî. Masaré yaí weeró noho bahugíre êho peó dutigi tohó weewí. Naâre yaí weeró noho bahugíre yeé dutiwî. Kîî yaí weeró noho bahugíta di'pîhí me'ra kamí da're no'o'ki niîmigi, katíwî. ¹⁵Ovelha kapé sa'ari weeró noho kiogí a'tîro wee masisere kiowí. Yaí weeró noho bahugí yeé'kere katiká wee masisere kiowí. Teé me'ra kîî yeé'kere uúkú dutiwî. Tohó niiká teé yeé'kere êho peótirāre wêhe dutígi tohó weewí. ¹⁶Apêye maa niî pe'tirāre a'tîro wee dutiwî. Naâ diápoapire ou naa yaá diakí hí kâha amukāpire apêye noho ohâ ô'o dutiwî. Mehô niirāre, wiôrāre, pehé kiorāre, pahasé kiorāre, âpêrāre da'râ ko'terāre, da'râ ko'tetirāre tohó wee dutiwî. ¹⁷Tohó ohâ ô'o no'oya marirâ neê duu dutíti, neê duá dutiti no'owâ. Tohó niiká kîî wameré ohâ ô'o no'oya marirâ ou kîî wamé weeró noho bahusêre moorâ kê'ra meharóta neê duu dutíti, neê duá dutiti no'owâ. ¹⁸A'teré ti'o masíro iá'. No'ó ti'o masígi nohore yaí weeró noho bahugí wamere masíta basió'. Kîî kiorí wame masa wamé niî'. Kîî wamé seiscentos sessenta e seis niî'.

Cento quarenta e quatro mil masa Ô'âkî hire basâ peo'ke niî'

14 Be'ró yiî Ô'âkî hi maki ovelha wi'magí weeró noho bahugíre írigí Sião wamêtikihipi nu'kuká î'yâwi. Kîî me'ra pâhará cento quarenta e quatro mil masa niîwâ. Naâ Ô'âkî hi maki ovelha wi'magí weeró noho bahugí wamere, kîî paki wamére naâ diâpoapi ohâ ô'o no'o'kârâ niîwâ. ²Be'ró i'mîsepi ípítí bisí dihatikâ ti'owí. Pehe maári po'é yaha a'mâ bírose weeró noho bisí dihatiwi. Bipô pûtro paâro weeró noho bisí wi. Pâhará biâ pítesere biâ pítero weeró noho bisí wi. ³Naâ cento quarenta e quatro mil masa wiôgi duhirí kumuro pí'topi niîwâ. Naâ sô'ó niîkârâ ba'pâritirâ katisé kiorá weeró noho bahurá î'yóropi, tohó niiká wiôrá bikirá î'yóropi basâwâ. Apêye ma'má basasére basâ peowâ. Naâ di'akî teeré basâ masiwâ. Apêrà naâ basasére neê basâ masitiwâ. Naâ a'ti nukúkâkâharâ wa'teropi niirâ Ô'âkî hi yi'rió no'o'kârâ niîwâ. ⁴Naâ neê ni'kâti numiâ me'ra yâ'âro weetíkârâ niîwâ. Naâ Ô'âkî hi maki ovelha wi'magí weeró noho bahugíre no'ó kîî wa'aró siru tuúwâ. Naâ a'ti nukúkâkâharâ wa'teropire yi'rió no'o'kârâ niîwâ. Naâ Ô'âkî hire, Ô'âkî hi maki ovelha wi'magí weeró noho bahugíre êho peó o'ó mi'ta'kârâ niîkârâ niîwâ. ⁵Naâ wa'terore niî soogi mariwí. Ô'âkî hi î'yóropire bu'îri marirâ niîwâ.

I'tiárâ Ô'âkî hire werê ko'terâ naâ werê'ke niî'

⁶Be'ró âpí Ô'âkî hire werê ko'tegi i'miâropi wiiká î'yâwi. Kîî niî pe'tirâ a'ti nukúkâkâharâre pe'titise kiti, Ô'âkî hi masaré yi'riómi niisé kitire werégí niîwí. Niî pe'tise di'takâharâre, niî pe'tise kurarikâharâre werégí niîwí. Tohó niiká mehêkâ uúkûrâre, niî pe'tise makarikâharâre tee kitire werégí niîwí. ⁷Kîî tutuaró me'ra a'tíro niîwí:

—Ô'âkî hire wio pesáse me'ra êho peóya. “Kîî âyú butia'gi niîmi”, niíya. Kîî bu'îri da'rérí kura ehâ toha'. Kîî i'mîsere, a'tí di'tare weéki niîwí. Diâ pahirí maa, niî pe'tise no'ó akó niisé maariakâre weéki niîwí. Kîî re êho peóya, niîwí.

⁸Kîî be'ró âpí Ô'âkî hire werê ko'tegi a'tíwí. A'tíro niîwí:

—Babilônia wamêtiri maka pe'tí wâ'karo weé'. Pe'tiá toha'. Naâ yâ'âro iári peha yi'ri ni'karâ, ke'â maatihírá weeró noho niî pe'tise di'takâharâre dohorê'wâ. Naâre î'yâ kúu, apêrà kê'ra naâ weeró noho yâ'âro weewá, niîwí.

⁹⁻¹⁰Piárâ Ô'âkî hire werê ko'terâ be'ró âpí bahuáwí. Tutuaró me'ra a'tíro niîwí:

—Yaí weeró noho bahugíre, kîî yeê'kere êho peógi nohore Ô'âkî hi ípítí bu'îri da'rêgisami. Tohó niiká kîî yaá diâpoapi ou kîî yaá amúkâpi yaí weeró noho bahugí wameré ohâ ô'o no'o'ki nohore meharóta bu'îri da'rêgisami. Ô'âkî hi kîî me'ra pûtro uâgi, tohó weegísami. Tutuaró me'ra dioró mariró bu'îri da'rêgisami. Pekâ me'epi opê weeró noho bahusé sipisé me'ra ípítí pí'etíkâ weegísami. Ô'âkî hire werê ko'terâ î'yóropi, tohó niiká Ô'âkî hi maki ovelha wi'magí weeró noho bahugí î'yóropi tohó weegísami. ¹¹Naâre î há kô'ase o'mé tohó o'mé pu'su nu'kurósa'. Neê pe'tisomé. Yaí weeró noho bahugíre, kîî yeê'kere êho peórá noho ou kîî wameré ohâ ô'o no'orâ noho pí'etí nu'kurásama. Ímî koho, yamí neê soosomé, niîwí.

¹²Tohó weérâ Ô'âkî hi yarâ, kîî dutisére weérâ, yâ'âro wa'asére wâkú tutuaya. Jesu Cristore êho peó nu'kurâ, tohóta weeyá.

¹³ Be'ró ni'kí i'mîsepi niigi úukúkã ti'owí. Yi'íre niíwí:
—A'tíro oháya: “Ni'kaká me'ra marí wiôgíre êho peorã wêrirã
e'katírãsama.”

Espírito Santo kêra “Tohôta nií”, niíwí. “Naã katírã Ô'ákí hi yeere werêrã, pi'etiwã. Naã wêrika be'ro Ô'ákí hi naã äyuró weé'kere wapa yeégisami. Tohó weérã naã a'ti nukúkãpi pi'etísere du'ú, äyuró soorãsama”, niíwí Espírito Santo.

A'tí di'takãhase otesékãhase nií'

¹⁴ Be'ró yi'í o'mé butírí kurare i'lyãwi. Tii kurá bu'i ni'kí masí weeró noho ipítigi duhîwí. Kíí dipôapi ni'ká be'to ouro me'ra weéka be'tore pesãwí. Di'píhi kawero ise yohári pîhíhore kiowí. ¹⁵ Ápí Ô'ákí hire werê ko'tegi Ô'ákí hi wi'ipi ni'ki wihátíwí. Kíí o'me kurápi duhigíre tutuaró me'ra karíkúwí:

—Mí'í yáã pîhi me'ra otesére tãra miíya. A'tí di'takãhase otesé dika miirí kura noho nií toha'. Teé bopoásepi nií', niíwí.

¹⁶ Kíí tohó niiká ti'ógí, o'me kurápi duhigí kí i' yáã pîhi me'ra a'ti nukúkãkãhase otesére tãra miíwí. Tee dikáre miíwí.

¹⁷ Be'ró ápi Ô'ákí hire werê ko'tegi i'mîsepi niirí wi'í Ô'ákí hi wi'ipi ni'ki wihátíwí. Kíí kê'ra di'píhi kawero ise yohári pîhíhore kiowí. ¹⁸ Be'ró ápi Ô'ákí hire wa'íkí rã i' há moro peo wiaro pi'tokí hi wihátíwí. Kíí pekã me'ere dutí masisere kiowí. Tií me'e wiôgi niíwí. Kíí ápi di'píhi ise yohári pîhíre kiogíre tutuaró me'ra niíwí:

—Mí'í yáã pîhi ise yohári pîhi me'ra a'ti nukúkãkãhase i'sê tô'orire ditê miíya. Teé yáã toha'.

¹⁹ Kíí tohó niiká ti'ógí, kí i' yáã pîhi me'ra a'ti nukúkãkãhase i'sêre ditêwí. Teeré mií, pahírí tûkuhopi i'sê koo naã bipeátohopi kúúwí. Teé bipe sãase Ô'ákí hi yã'arãre ipíti bu'íri da'resé nií', nií si'riro weé'. ²⁰ Teé i'sêre makã sumútohopi bipêwã. Naã biperí kurare dií pahiró naã i'sê biperí wi'ipire wihawí. Teé dií ni'ká maa pahírí maaho wa'ãwi. Cavaloa wamí taha dekopi dii pakáre mirí tiowã. Trezentos quilômetros yoarí maa niíwí.

Ô'ákí hire werê ko'terã bu'íri da'rê tioatehe nií'

15 Be'ró mehêkã bahusé i'lyã mariase pakare i'mîsepi i'lyãwi. Ô'ákí hire werê ko'terã setere i'lyãwi. Naã nikita taha a'ti nukúkãkãharãre bu'íri da'rê tioatehere kiowá. Teé bu'íri da'rê tiose me'ra Ô'ákí hi uasé pe'tirósa'.

² Apêye kê'rare diã pahírí maare i'lyãwi. Tii maã akostírí maa pekã me'e me'ra moréka maa weeró noho bahuwí. Tii maã sumútohopire pãharã masá nu'kuwã. Naã yaí weeró noho bahugíre, tohó niiká kíí yeé'kere êho peóti'kãrã niíwã. Tohó niiká kíí wameré ohã ô'o no'oya marí'kãrã niíwã. Naã Ô'ákí hi o'ô'ke biã pîtesere kiowá. ³ Naã Ô'ákí hire da'rã ko'tegi Moisé yee basasé basã peowã. Ô'ákí hi maki ovelha wi'magí weeró noho bahugí yee basasé kê'rare basã peowã. A'tíro niíwã:

Ô'ákí hi i'sã wiôgi, mi'í tutuã yi'rigi nií'. Nií pe'tise mi'í

weé'ke äyú butia'se paka nií'. Teeré i'lyãrã, i'sã i'lyã maria wa'ã'.

Mi'í nií pe'tise makarikãharã wiôgi nií'.

Mi'í weesétise keoró nií'. Mi'íre neé nií soose marí'.

⁴ Nií pe'tirá mi'íre wio pesásé me'ra i'lyãrãsama.

Nií pe'tirá mi'íre “Äyú yi'rigi, tutuã yi'rigi nií'” niírásama.

Mi'î ni'kitá yá'asé moogí nií'.

Nií pe'tise makarikáhará mi'î re êho peórâsama.

Mi'î keoró weé'kere î'yârá, naâ tohó weerâsama, nií basâwá.

⁵ Be'ró Ô'âkî hi wi'i, i'mîsepi niirí wi'ire sopé pâriká î'yâwi. Tii wi'i po'peapi Ô'âkî hi Nií butia'ri Tükure î'yâwi. Tii tükúpi nií'kârâ sete Ô'âkî hire werê ko'terâ, bu'îri da'rê tioatehere kiorá mií, wihátiwá. Naâ butisé ú'îri marisé su'tí ipíti asistérese sâyâwá. Naâ kutîropire naâ niki ouro me'ra weé'ke daarire kiowá. ⁷ Be'ró ni'kí katisé kiorá me'rakî hi a'tîro weewí. Kîî Ô'âkî hire werê ko'terâ setere naâ niki bapâri o'dôwí. Teé ouro me'ra weé'ke paari niíwi. Tee paári Ô'âkî hi kîî bu'îri da'reátehere posetíwi. Ô'âkî hi katí nu'kugi a'ti nukúkákáharâre ipíti bu'îri da'rêgisami. ⁸ Tee paári naâre o'ôka be'ró Ô'âkî hi Nií butia'ri Tükupire a'tîro wa'âwi. Tii tükúpire Ô'âkî hi äyú yi'riase, kîî tutuá yi'riase o'mé pu'su se'sa wa'âwi. Pûuro asistéwi. Neé ni'kí tii tükúpire sâháata basiótiwi. Be'ró sete Ô'âkî hire werê ko'terâ naâ bu'îri da'rêka be'ropi sâháata basiówi.

Ô'âkî hi bu'îri da'reátehe nií'

16 Be'ró Ô'âkî hi wi'i i'mîse niirí wi'ipi niigíre tutuaró me'ra uúkúkâ ti'owí. Kîî sete Ô'âkî hire werê ko'terâre a'tîro niíwi:

—Misa yeé paarikáhase Ô'âkî hi bu'îri da'reátehere nukúkâpi piô dihorá wa'âya, niíwi.

² Nií mi'tagi wa'á, kîî yaá paare di'tâpi piô dihowí. Tohó weéka be'ro masá yaí weeró noho bahugí wamere ohâ ô'o no'okârâre, kîî weeró noho bahusé yeé'kere êho peórâre a'tîro wa'âwi. Nií pe'tirá yá'asé kamí musurítise kiorá tohawá. Pûuro pûrî no'owá.

³ Kîî be'ro âpi wa'á, kîî yaá paare diá pahirí maahopire piô yôowí. Tii maá dií maaho dohowí. Wêrî'ki yee dii bi'â'ke weeró noho niíwi. Nií pe'tirá tii maáhopi niirá wêrî pe'tia wa'âwá.

⁴ Piárâ be'rokî hi kîî yaá paakâhasere nií pe'tise no'ó akó niisé maariakâpire piô yôowí. Tohó weeká, teé kê'ra dií maari wa'âwi. ⁵ Be'ró Ô'âkî hire werê ko'tegi nií pe'tise akó wiôgi a'tîro niíwi:

—Wiôgi, mi'î yá'asé moogí nií'. Mi'î neé warokî hi, a'tóka tero kê'rare nií nu'ku'. Mi'î naâre a'tîro bu'îri da'rêgi, keoró weégi weé'. ⁶ Naâ a'tîro weékârâ niíwá. Mi'î yará mi'î yeékâhase wererâre wêhé kô'akârâ niíwá. Naa yeé dii a'mâ birokâ weékârâ niíwá. Tohó weégi mi'î naâre akó dií dohó'kere si'ri dutígi, keoró weégi weé'. Naâre tohóta íá, niíwí.

⁷ Be'ró ni'kí Ô'âkî hire wa'îkirá î há moro peo wiaro tiropi uúkúkâ ti'owí. A'tîro niíwi:

—Tohóta nií'. Ô'âkî hi ísá wiôgi, mi'î tutuá yi'ria'. Mi'î nií sooro mariró keoró bu'îri da'rêgi weé', niíwí.

⁸ Be'ró, i'tiárâ be'rokî hi kîî yaá paakâhasere muhîpú imî kohokî hi bu'ipi piô peowí. Tohó weéka be'ro muhîpú ipíti asiwí. Teé kîî asisé me'ra masaré î há masiwí. ⁹ Masá ipíti waro î há no'owá. Tohó î há no'omirá, neé naâ yá'âro weé'kere bihá weti, naâ wâkusére dika yúutiwá. Ô'âkî hire “Áyugí niími”, neé niítiwá. Kîî re äyuró uúkúro noho o'ôrá, kîî re yá'âro uúkúwá. Ô'âkî hi bu'îri da'rêmiká, tohó weewá.

¹⁰ Be'ró, ba'pâritirá be'rokî hi a'tîro weewí. Kîî yaá paakâhasere yaí weeró noho bahugí duhirí kumuropire piô dihowí. Nií pe'tiro kîî dutisé niirópi na'í tí'a wa'âwi. Masá pûuro pûrisé tí'ó yá'arâ, ipíti biritú, kú'rî

diowā. ¹¹Tohō pi'etímira, naâ yā'áro weesére neê du'utiwā. Du'uró noho o'ôrá, naâ kamî ipíti pūri no'orā, Ô'âkî hi i'mîsepi niigíre yā'â butia'ro uúkūwā.

¹²Be'ró taha ni'kâmukārā be'rokî hi kîi yaá paakāhasere pahiri maa Eufrate wamētiri maahopire piô yōowî. Tii maá si'bî pe'tia wa'áwi. Apêye di'takāharā muhîpū mihátiro pe'e niirāre naâ wiôrá a'tiátihi ma'are apo yuúro weewî.

¹³Be'ró, yi'î sô'ó niikārāre î'yāwi. Pirohó weeró noho bahugíre, âpi yaí weeró noho bahugíre, tohō niiká ovelha wi'magi weeró noho kapé sa'aritiigi nií soose kiti werê mi'tagíre î'yāwi. Naâ i'tiárā yee iseripi wātiâ wihawā. Wātiâ ta'árokia weeró noho bahurá niíwā. ¹⁴Á'rá i'tiárā yee iseripi wihá'kārā wātiâ pehé weé i'yosere weewā. Naâ a'ti nukúkākāharā wiôrá nií pe'tirāre a'mê wêhe dutirá neêowā. Naâ a'mê wêheatihî nimi Ô'âkî hi tutuâ yi'riagi yaa nimi waro niírosa'.

¹⁵Jesu Cristo a'tíro niíki niíwî:

—Tí'ô masiya. Wākútiri yahagi a'tígi weeró noho yi'î a'tígiti. Su'ti sāyagi weeró noho yi'î a'tiátehere āyuró wākú yuugi noho e'katígisami. Tohō weégi su'ti marígi kîi re î'yā weekā, bopōyasome.

¹⁶Naâ wātiâ a'ti nukúkākāharā wiôráre hebreu yee me'ra Armagedó wamētiropi neêowā.

¹⁷Be'ró, seis be'rokî hi, kîi yaá paakāhasere i'miáropi piô dihowî. Teé be'ro Ô'âkî hi wi'î i'mîse niirî wi'î po'peapi wiôgi duhirî kumuropi duhigi tutuaró me'ra uúkūwî. A'tíro niíwî:

—Nií pe'tise tu'â eha ni'ko pe'o no'o'. ¹⁸Kîî tohō niiká, bipô ya'ba, ipíti paawî. Kîî paakā, mehêkâ bisî mihawi. Di'tâ ipíti nara sáawî. Masá a'ti nukúkāpi nií ni'kaka tero, a'tóka terore di'tâ toô kā'ro neê nara sáa wee'. Ipíti waro títare nara sáawî. ¹⁹Pahiri maka i'tiáro ye'tî, dika watî ni'kawî. A'ti nukúkākāhase nií pe'tirokāhase makaripi se'tê dihawî. Ô'âkî hi bu'iri da'rêgiti niígi, pahiri maka Babilônia wamētiri makakāharāre wākúki niíwî. Naâ me'ra ipíti uâgi, naāre bu'iri da'rêwî. ²⁰Tohō wa'aká, nií pe'tise iripagi, opa níkiri bahu dutî dihawî. ²¹Tohō niiká masaré yisiáse peeri paka birî pehawî. Ni'karé peeri quarenta quilos níkî wi. Ô'âkî hi tee peéri me'ra naāre ipíti bu'iri da'reká î'yārá, yā'â butia'ro kîi re uúkūwā.

Imiá me'ra a'me tārā wapá ta'agore bu'iri da'resé nií'

17 Be'ró a'tíro î'yāwi. Ni'kí sô'ó niikārā sete Ô'âkî hire werê ko'terā me'rakî hire î'yāwi. Kîî sô'ó nií'ke paari kiorá me'rakî hi niíwî. Yi'î tiro a'tíwî. A'tíro niíwî:

—Te'á, yi'î mi'îre imiá me'ra a'me tārā wapá ta'agore bu'iri da'resére î'yogíti. Koô pakasé maari bu'ipi duhîmo. ²A'ti nukúkākāharā wiôrá koô me'ra a'me tārā baha ke'atikārā niíwā. Koô a'ti nukúkākāharāre iāri pehase me'ra ke'á maatihírá weeró noho wa'aká weéko niíwō, niíwî.

³Be'ró Espírito Santo yi'îre kê'esé weeró noho î'yowî. Sô'ó niíki Ô'âkî hire werê ko'tegi masá marirópi yi'îre miáawî. Toopî ni'koré î'yāwi. Koô mehêkâ bahugí sô'agi bu'ipi pesawō. Mehêkâ bahugíre kîi yaá ipi nií pe'tiropire pehé yā'sé Ô'âkî hi kîî yabisé wame wā'yawî. Mehêkâ bahugí sete dipopá kiowî. Apêye kê'rare, piámukāse kapé sa'aritiwî. ⁴Koô numiô sô'á yîi boó kurerore, tohō niiká sô'aró warore sâyawō. Koo yaá su'tíro ouro, î tã peeri wapa bihíse peeriakā me'ra,

apêye butisé pérola wamêtise me'ra ma'mâ su'a no'owi. Koô ni'kâ paa ouro me'ra weéka paa sa'wire kiowó. Niisé niki yâ'asé tii paápîre mu'mûwi. Koô imiá me'ra yâ'áro a'me târá baha ke'ati'ke niíwi. ⁵Tohó niiká koô diápoapîre mehêkâ bahurí wame ohâ ô'o no'okaro niíwi. A'tîro niíwi: “Babilônia pahirí makaho, nií pe'tirâ yâ'ará numiâ imiaré a'me târá wapá ta'ará numia pako nií'. Tohó niiká nií pe'tirâ yâ'â yî'ri ni'kase weerâ pako nií’”, nií wâ'yawi. ⁶Be'ró a'tîro i'yâwi. Koô ke'ágo weewó. Ô'âkî hi yarâ Jesu Cristo yee kitire wererâ wêhé no'o'kârâ yee dii me'ra tohó wa'âwô. Koôre i'yâgi, “De'ró weéro tohó wa'âmitito?” niíwi. ⁷Tohó wa'aká, Ô'âkî hire weré ko'tegi yî'ire niíwi:

—De'ró weégi mi'î toô kâ'ro ikiáti? Sikoré ya'yíóseré mi'îre masiká weegíti. Tohó niiká mehêkâ bahugí bu'ipi pesâ wâ'kasere werégiti. Kîî sete dípopátigi piámukâse kapé sa'aritimí. ⁸A'tîro nií'. Mehêkâ bahugí mi'î i'yâ'ki díporópire niímiwí. A'tóka tero marimí. Tohó niímigi, be'ropí i'yâ bahu dutí dihari peepi nií'ki mihátigisami. Kîî pekâ me'epi wa'â dohaatoho díporo tohó weegísami. A'ti nukúkâkâharâ yâ'ará mehêkâ bahugíre i'yârâ, ikiárâsama. Naâ neê waropîta a'tí di'ta weé ni'kari kura naâ wameré katirí pûripi ohâ ô'o no'oya marí'kârâ nií tîharâ, tohó wa'ârâsama. Kîî díporópi nií'ki a'tîro niikâre marimí. Be'ropí a'tígisami.

⁹No'ó tî'o masíra noho a'teré masíta basió'. Kîî sete dípopá a'tîro nií sî'riro weé'. Teepá nikita taha íripagí koô duhisépagi nií'. ¹⁰Tohó niiká teepáta taha a'tîro nií sî'riro weé'. Sete wiôrá niíma, niíro weé'. Ni'kâmukârâ wiôrá pe'ti dihá tohakârâ niíwâ. Ni'kâroakâre ni'kí masaré dutígi weemí. Ápi a'títimi yuhûpi. Kîî a'tígi, yoátikâ niígisami. ¹¹Neê waropîre sô'agí mehêkâ bahugí nií'ki a'tîro niikâre marimí. Kîíta â'rá sete wiôrá be'rokí hi wiôgi niákîhi niígisami. Kîî naâ me'rakí hi niími. Be'ró pekâ me'epi wa'â dohagisami.

¹²Mehêkâ bahugí kapé sa'ari mi'î i'yâ'ke a'tîro nií sî'riro weé'. Piámukârâ wiôrá niíma, niíro weé'. Naâ dutí ni'katima yuhûpi. Yoátikâ, ni'kâ horata dutírasama. Mehêkâ bahugí sô'agí kê'ra naâ me'ra dutí tamugísami. ¹³Á'rá piámukârâ wiôrá ni'kâro noho wâkusétírasama. Naâ mehêkâ bahugíre naâ dutisé kiosére o'ô'rasama. ¹⁴Naâ Ô'âkî hi maki ovelha wi'magí weeró noho bahugí me'ra a'mê wêherâsama. Kîî naâre dokâ ke'akâ weegísami. Kîî nií pe'tirâ wiôrá bu'ipi niími. Tohó weégi naâre tohó weegísami. Ô'âkî hi maki me'rakâharâ Ô'âkî hi besé'kârâ niíma. Ô'âkî hi iaró weé nu'kurâ niíma, niíwí.

¹⁵Be'ró Ô'âkî hire weré ko'tegi opâturi a'té kê'rare niíwi:

—Mi'î i'yâ'ko numiô sô'ó niíko yâ'agó pakasé maaripi duhiámo. Koô duhí'ke maari a'tîro nií sî'riro weé'. Tee maári paka masá pâharâ niíma, nií sî'riro weé'. Pehe makárikâharâ, pehe kurárikâharâ, mehêkâ uúkûrâ, pehé di'takâharâ niíma, niíro weé'. ¹⁶Mehêkâ bahugí sô'agí piámukârâ wiôrá me'ra yâ'agóre i'yâ tu'tírasama. Koôre kô'ârâsama. Koôre su'ti marígo tohaká weerâsama. Koôre ba'ârâsama. Be'ró í há kô'arâsama. ¹⁷Ô'âkî hi naâre kîî iaró noho weeká weegísami. Tohó weégi naâre ni'kâro noho wâkuká weegísami. Naâ mehêkâ bahugíre wiôgi sô'orâsama. Teê Ô'âkî hi “A'tîro wa'ârosa” nií'karo nohota wa'âka be'ropi wiôgi nií tiogísami. ¹⁸Numiô mi'î i'yâ'ko sô'ó niíka maka pahirí maka nií'. Tii makáta nií pe'tirâ a'ti nukúkâkâharâ wiôráre dutirí maka nií', niíwí.

Babilônia makare bu'fri da'rê bahurió dihose ni'

18 Be'ró, ápi Ô'ákî hire werê ko'tegi i'mîsepi ni'ki dihátikâ i'yâwi. Kîî pehé dutí masiwî. Kîî asistése me'ra a'ti imí kohopire äyuró asisté kehe küuwî. ²Tutuaró me'ra karíkwî:

—Babilônia pahírî maka pe'tí wâ'karo weé'. Pe'tiá toha'. Ni'kâroakâre wâtîá, âpêrâ bahutírâ yâ'ará naâ niírî maka dohó'. Tohó niiká ni' pe'tirâ mirikî hiá yâ'ará yabiórâ niiró dohó'. ³Tii makákâharâ masá yâ'áro iâri peha yî'ri ni'ka'kârâ niîwâ. Teeré ni' pe'tise di'takâharâ ke'á maatihírâ weeró noho wee sirú tuuwâ. A'ti nukúkâkâharâ wiórâ naâ me'ra a'mé si'awâ. Tii makákâharâ iâri peha yî'ri maharâ, pehe waró apeká no'ó niisére duú ma'awâ. Tohó weerâ a'ti nukúkâkâharâ naäre duâ wapá ta'arâ niyéru bikirâ tohawá.

⁴Be'ró ápi i'mîsepi niigí uúkukâ ti'owí. A'tîro niîwî:

—Misâ, yarâ nií'. A'ti makâre wiháaya. Wiháatirâ, tii makákâharâ naâ yâ'áro weesére bu'fî peha tamu boosa'. Bu'fri da'rê no'ó boosa'. ⁵A'tîro nií'. Naâ yâ'áro weé'ke pehe waró nií'. I'mîsepi tu'â eta ke'aro weeró noho nií'. Ô'ákî hi naâ yâ'áro weé'kere masími. ⁶Tii makákâharâ âpêrâre yâ'áro weékârâ niîwâ. Naâ âpêrâre yâ'áro weé'karo nohota naâ kê'ra meharóta yâ'áro weé no'oato. Âpêrâre pi'etíkâ weé'karo nohota piâti nemoró pi'etíkâ weeáto. Naäre bu'fri da'reáto. ⁷Tii makákâharâ a'tîro niikârâ niîwâ: “Apêrâ yî'rióró äyú yî'ri ni'ka'”, niikârâ niîwâ. Tohó niiká naâ no'ó iaró apêye nohore duú ma'arâ pahíró niyéru kô'ákâ'kârâ niîwâ. Naâ tohó weé'kârâre ip'ti pûrisé pi'etíkâ weeáto. Tii makákâharâ a'tîro wákûsama. “Í sâ wiôgo weeró noho nií'. Wapê wi'io weeró noho nií wee'. Neê bihâ wetisome”, nií wákûsama. ⁸Tohó niisé bu'fri wákûtiro ni'ká nimita yâ'asé tii makâre wa'ârosa'. Wêrisé, pûuro pi'etise, ihá boasé wa'ârosa'. Pekâ me'e me'ra í há kô'a no'orosa'. Ô'ákî hi tutuâ yî'ri ni'kagi tii makákâharâre bu'fri da'rêgisami, niîwî i'mîsepi niigí.

⁹A'ti nukúkâkâharâ wiórâ tii makákâharâ me'ra yâ'áro a'mé si'a, no'ó iaró yâ'áro weé ma'akârâ niîwâ. A'ti nukúkâkâharâ wiórâ tii maká í hî, o'mé pu'su nu'kukâ i'yârâ, pûuro utírâsama. ¹⁰Tohó í hirí kurare wiórâ, marí kê'rare bu'fri da'rêri niîrâ, yoarópi i'yâ nu'kurâsama. A'tîro niîrâsama:

—Babilônia yâ'á butia'ro wa'áro weé'. Pahírî maka, tutuarí maka niîmiwi. Wákûtiro bu'fri da'rê bahurió diho no'ókâ'.

¹¹A'ti nukúkâkâharâ duâ wapá ta'arâ kê'ra tii makâre utírâsama. “Noá mari yeére duurâsari baa?” nií wákûrâsama. Teeré wákûrâ, pûuro dihasé wâ'arâsama. ¹²Naâ miíti duasé a'tikése niikaro niîwi. Ouro me'ra weé'ke, prata me'ra weé'ke, í tâ peeri wapa bihíse peeri, butisé peeri pérola wamêtise peeri niikaro niîwi. Tohó niiká su'tí äyusé butisé, su'tí así pa'ase, sô'â yîi boó kuresé, sô'asé niikaro niîwi. Apêye kê'ra ni' pe'tise yukí i'mî tihise me'ra weé'ke, akostíse butisé mar'fí wamêtise me'ra weé'kere miítikârâ niîwâ. Tohó niiká wapa bihíse yukí me'ra weé'ke, komé me'ra weé'ke, bronze wamêtise me'ra weé'ke, mármore wamêtise me'ra weé'kere miíti mihakârâ niîwâ. ¹³Apêye naâ miíti duasé canela wamêtise, i'mî tihise, naâ í há moro peose noho, mirra wamêtise, i'sé dika koo vinho, i'sé piritári ba'asé, farinha páu weesé, tohó niiká trigo miíti mihakârâ niîwâ. Apêrâre wa'íkîrâ apeká o'marâre, ovelhare, cavaloare, tûrusépawi cavaloa wehesére, masaré da'rá wâ'ya ko'terâpireta miíti dohakârâ niîwâ. ¹⁴Duará tii maká í hî ka be'ro a'tîro niîrâsama:

—Yuki diká misâ ipíti ba'á ti'sase noho pe'tiá wa'á!. Niî pe'tise misâ äyusé kiosé noho pe'ti dihá wa'á!. Neê boka nemósoma.

¹⁵Tii makákāharāre duarā äyuró wapá ta'akārā niîmiwā. Tii makákāharā pi'etíkā ì'yārā, yoarópi tohákā'rāsama. Ipíti uí, utírāsama.
¹⁶A'ti-ro niî karíkūrāsama:

—Äyurí maka pahirí maka niîmika maka yā'ā butia'ro wa'ākā!. Tii maká ni'kó numiô weeró noho niîmiwi. Äyusé sō'ā yīi boó kurerore, tohó niiká sō'aróre sāyagó weeró noho niîmiwi. Koó su'tiropi ouro, ìtā peeri wapa bihíse peeri, apēye peeri pérola wamētise peeri me'ra ma'mā su'a'karo weeró noho niîmiwi. ¹⁷A'té niî pe'tise pehé wākūtiro pe'ti dihá wa'á!, niîrāsama.

Niî pe'tirā yukîsiho au tuūrā, tiwipí wa'arā, tiwipí da'rarā yoarópi uírā toharāsama. Tohó niiká niî pe'tirā diā pahirí maapi da'rarā meharóta toharāsama. ¹⁸Tii maká ì hiká ì'yārā, karíkūrāsama:

—A'ti maká weeró noho äyurí maka ape maká marí!, niîrāsama.

¹⁹Pūūro bihá wetirā naā dipopápi di'tāre ôre peorāsama. Utí, dihasé wā'arā, karíkūrāsama:

—Äyurí maka pahirí maka yā'ā butia'ro wa'ākā!. Tii makákāhase niyéru me'ra niî pe'tirā yukîsipawí paka kiorā äyuró wapá ta'amiwā. Wākūtiro pe'ti diháka maka tohá!, niîrāsama.

²⁰I'mîsepi niirā pe'e tii makāre kō'aká, e'katíya. Misâ Jesu Cristo bese kúú'kārā, Ô'ākí hi yee kitire weré turiarā, niî pe'tirā kīi yarā e'katíya. Tii makákāharā misāre pi'etíkā weewá. Teé bu'iri Ô'ākí hi naāre bu'iri da'rêmi.

²¹Be'ró ni'kí Ô'ākí hire weré ko'tegi tutuagí ìtāgahore mii morówi. Otesé peerire tō'ô di'ô äriákahaho weeró noho bahuwí. Tigaré diā pahirí maapi doke yōōgi, a'ti-ro niîwī:

—Tigaré doke yōoro weeró noho Babilônia pahirí makaho niîmiro, doke yōó no'orosa!. Neê opāturi tii makāre ì'yā nemosoma. ²²Tii maká niî pe'tiropi basasé neê ti'ó no'osome. Biā pītese bisisé, wēopawí putisé, coroneta putisé bisí some. No'ó niisére da'rarā neê marirāsama. Otesé peeri äriákā bisisé kē'ra neê ti'ó no'osome. ²³Apēye kē'ra si'óo'se noho marirósa!. Naā amúká di'teká bosê nimi wee peorā karíkūse ti'ó no'oya marirósa!. Too dipórore tii makákāharā duú wapá ta'arā apēye di'takāharā nemoró duú me'rirā niîmiwā. Tii makákāharā ti'ó yā'a masirā weeró noho weé me'rirā niî pe'tirokāharāre êho peókā weewá.

²⁴Tii makápi Ô'ākí hi yee kitire weré turiarā, kīi re êho peorā wēhé no'o'kārā yee dii niîwi. Tohó niiká niî pe'tirā a'ti nukúkākāharā wēhé no'o'kārā yee dii niîwi. Masaré wēhé'ke wapa tii makāre bu'iri da'rê no'orosa!, niîwī Ô'ākí hire weré ko'tegi.

19 Babilōniare bu'iri da'reká ì'yāka be'ro a'ti-ro wa'āwi. Yi'f João pāhará masá i'mîsepi niirā tutuaró me'ra uúküsere ti'owí. A'ti-ro e'katí peowā:

Ô'ākí hire e'katí peorā. Aleluia. Ô'ākí hi marí wiōgi, maríre yi'riōgi niîmi. Niî pe'tirā bu'ipi niîmi. Tutuā yi'rigi niîmi.

²A'ti-ro niî!. Kīi niî sooro mariró keoró bu'iri da'rêmi. Tii makāre bu'iri da'rêmi. Tii maká ni'kó numiô imiare a'me tārā wapá ta'ago weeró noho niîwi. Tii makákāharā yā'āro weerā niî pe'tirāre a'ti nukúkākāharāre dohórē'wā. Ô'ākí hi kīi re da'rā ko'terāre wēhé'ke wapa tii makákāharāre bu'iri da'rê a'mewī, niî basá peowā.

³Opāturi niîwā taha:

—Ô'âkî hire e'katí peorã. Aleluia. Tii makáre î hã kô'ase o'mé tohó o'mé pu'su nu'kurosã, niîwã.

⁴Vinte e quatro wiôrã bikirã, tohó niiká ba'pâritirã katisé kiorá weeró noho bahurá Ô'âkî hi wiôgi duhirí kumuropi duhigíre êho peorã ehã ke'awã. A'tíro niîwã:

—Tohóta wa'aáto. Ô'âkî hire e'katí peorã. Aleluia, niîwã.

⁵Be'ró wiôgi duhirí kumuro pi'to niigi a'tíro niîwã:

Niî pe'tirã Ô'âkî hi yeere da'rará kîî marí wiôgire âyuró e'katí peoya. Niî pe'tirã wio pesáse me'ra kîîre êho peorã, wiôrã, mehó niirã tohó weeyá, niîwã.

Ô'âkî hi masaré dutigí waro sãhá ni'kase niî'

⁶Be'ró yi'f pãhará masá uúkukã ti'owí. Pehe maári po'ê yaha a'mã birose maari weeró noho bisí wã. Bipó ipíti paãro weeró noho bisí wã. A'tíro niîwã:

Marí Ô'âkî hire e'katí peorã. Aleluia. Marí wiôgi tutuã yi'ri ni'kagi ni'kãroakãre niî pe'tirãre dutigí sãhá ni'kami.

⁷E'katirã. Ehëri pô'raripi e'katí butia'rã ti'ó yã'arã. “Ô'âkî hi âyú yi'riami”, niîrã. A'tíro niî'. Ô'âkî hi maki ovelha wi'magi weeró noho bahugí kîîre êho peorã me'ra niî ni'kari nimi ehã toha'. Kîîre êho peorã kîî nimó niiákoho weeró noho niîma. Ni'kó amúkã di'teátoho diporo âyuró ma'mã su'a no'osamo. Koô weeró noho naã apo yuú'kãrãpi niîma.

⁸Naã su'tí butisé û'iri marisé, pũuro asistéseré sãã no'o'kãrã niîma, niîwã. Butisé su'tí naã katirã âyuró weé'ke niî', niî si'riro weé'.

⁹Be'ró Ô'âkî hire weré ko'tegi yi'f re niîwã:

—A'tíro ohãya: “No'ó Ô'âkî hi maki ovelha wi'magi weeró noho bahugí amúkã di'terí bosé nimire i'yã duti no'orã noho e'katíya”, niî ohã dutiwí.

Kîî yi'f re niîwí taha:

—A'té uúkuse Ô'âkî hi uúkuse waro niî'.

¹⁰Ô'âkî hire weré ko'tegi tohó niiká ti'ógi, yi'f kîî tiro êho peógi ehã ke'awi. Yi'f tohó weeká i'yãgi, yi'f re niîwí:

—Tohó weetíkã'ya. Yi'f kã'ra kîîre da'rã ko'tegita niî'. Yi'f mi'f weeró noho niigi niî'. Tohó niiká mi'f akawerérã Jesu yeere weré nu'kurã weeró noho niî'. Yi'f re neê êho peótikã'ya. Ô'âkî hi pe'ere tohó weeyá. A'tíro niî'. Espírito Santo Ô'âkî hi yee weré mi'tarãre masaká weéki niîwí. Teé masisé me'ra werékãrã niîwã. Meharóta Jesu yeere wererã kã'ra Espírito Santo masisé o'osé me'ra weréma, niîwí.

Masí cavalo butigí bu'ipi pesasé kiti niî'

¹¹Be'ró, i'míse pãriká i'yãwi. Toopí cavalo butigí bahuáwí. Kîî bu'í pesagí a'tíro wamêtiwí. Keoró Weé nu'kugi, Diakí hí kî hi niîwí. Kîî masaré keoró besegí niîwí. Tohó niiká a'me kãégi keoró weegí niîwí. Tohó weégí tohó wamêtiwí. ¹²Kîî kapêri pekã me'e î hirí pô'ra weeró noho asiwí. Kîî dipôapire pehé wiôrã pesasé be'torire pesãwí. Kîîre ohã ô'o no'oka wamere kîî se'saro masíwí. ¹³Kîî yã su'tiro dií me'ra yosó'karore sãyãwí. Kîî wamêtiwí Ô'âkî hi uúkuse. ¹⁴Kîî yãrã surãra i'mísekãharã kîîre siru tuúwã. Naã su'tí butisé û'iri marisére sãyãwã. Naã cavaloa butirã bu'ipi pesãwã. ¹⁵Kîî iséropire di'píhí ise yohári pîhire kiowí. Tii pîhí me'ra kîî a'ti nukúkãkãharãre kamí da'regisami. Tutuaró me'ra dutígisami.

Naâ i'sêre tee koó miirã tutuaró me'ra nité sa'bese weeró noho kîî a'ti nukúkākāharā yā'áro weeráre bu'iri da'rêgisami. Ô'ākî hi tutuá y'i'rigi naâ me'ra uâ y'i'riami. Tohó weégi cavalo bu'i pesagí naâre ipíti waro bu'iri da'rêgisami. ¹⁶Kîî su'tíropi, tohó niiká kîî isôpi a'tíro ohá ô'o no'okaro niíwi: “Niî pe'tirã wiôrá bu'ipi wiôgi waro niími”, niî wā'yawi.

¹⁷Be'ró, ni'kí Ô'ākî hire werê ko'tegi muhîpû imí kohokí hi bu'ipi nu'kugíre i'yâwi. Kîî niî pe'tirã mirikí hiá i'miáropi wiirãre tutuaró me'ra karíkûwî:

—Nerêya. Ô'ākî hi pehé ba'asére apomí. ¹⁸Wiôrá yee di'ire ba'ârása'. Surára wiôráre, surára tutuaráre, cavaloa di'ire, naâ bu'i pesará di'ire ba'ârása'. Niî pe'tirã yee di'ire ba'ârása'. Da'rá ko'terãre, da'rá ko'tetirãre, wiôráre, mehô niirãre niî pe'tirãre ba'ârása', niíwi.

¹⁹Be'ró, sô'agí mehêkā bahugíre i'yâwi. Tohó niiká niî pe'tirã a'ti nukúkākāharā wiôráre naa yarã surára me'ra nereká i'yâwi. Naâ nerêka be'ro cavalo butigí bu'i pesagí me'ra, tohó niiká kîî yarã surára me'ra a'mê wêherãtirã tohó weewã. ²⁰Cavalo butigí bu'i pesagí mehêkā bahugíre yê'êwî. Ápi yaí weeró noho bahugí, ovelha wi'magí kapé sa'aritigi weeró noho bahugíre yê'êwî. Kííta niî soose kiti werê mi'tagi niíwi. Kííta taha masá yaí weeró noho bahugíre êho peoáto niígi mehêkā bahusé pakare weé i'yo basawí. Kîî weé i'yose me'ra niî pe'tirã yaí weeró noho bahugí wame ohá ô'o no'o'kãrãre a'tíro weewí. Naâre niî soo, êho peókã weewí. Yaí weeró noho bahugí ye'kere êho peorã kê'rare meharóta niî soo, êho peókã weewí. Be'ró, cavalo bu'i pesagí piará mehêkā bahurãre yê'êwî. Naâ piará katirãta pekã me'e dítarahopi doke yôo no'owã. Tii dítara enxofre wamêtise opê weeró noho sipisé me'ra i hî wi. ²¹Ápêrã naâ me'rakāharã pe'ere cavalo bu'ipi pesagí a'tíro weewí. Kîî yaá píhi kîî isêropi kióka píhi me'ra naâre wêhé pe'okã'wî. Niî pe'tirã mirikí hiá naa yeé di'ire pahí butia'ro ba'ã yapikã'wã.

Mil ki'mari wãtíre di'te kúuse nií'

20 Apêye kê'rare i'yâwi. Ni'kí Ô'ākî hire werê ko'tegi i'mísepi nií'ki dihãtiwí. Kîî niî bahu dutí dihari peekãha sãwíre kiowí. Tohó niiká kome daáhore kiowí. ²Kîî pírohó weeró noho bahugíre di'tewí. Pírô neê waro a'ti imí koho da'rêka be'rokí hi píró niî no'o'ki niími. Kîî wãtiã wiôgi niími. Kîîre kome daá me'ra pehé ki'mari, mil ki'mari di'te kúuwí. ³Kîîre niî bahu dutí dihari peepi tuu kehé dihowí. Be'ró tii peé sopere bi'ákã'wí. Tu'ã eha ni'ko, pi'rã bi'akã'wí. Mil ki'mari masaré niî soo êho peókã weetikã'ato niígi tohó weewí. Be'ró mil ki'mari y'i'ríka be'ro yoãtikã páo wíro no'ogisami.

⁴Be'ró, pehé wiôrá duhisé kumurire i'yâwi. Tee kumúripi duhirã a'ti nukúkākāharãre bese masísere o'ô no'o'kãrã niíwã. Ápêrã kê'rare i'yâwi. Naâ Ô'ākî hi yee kiti, tohó niiká Jesu yeére weresé bu'iri naâ dipopãre di'te sure no'o'kãrã niíwã. Naâ yaí weeró noho bahugí ye'kere neê êho peotikãrã niíwã. Tohó niiká naâ diãpoapi, naâ amúkãripi kîî wameré neê ohá ô'o no'otikãrã niíwã. Naâ wêrî'kãrãpi niímira, masawã. Naâ masãka be'ro Cristo me'ra mil ki'mari masaré dutí tamuwã. ⁵⁻⁶Naâ masasé neê waro wêrî'kãrã masá mi'ta'ke nií'. Wêrî'kãrã masá mi'ta'kãrã Ô'ākî hi yarã yã'asé moorã niíma. E'katíma. Naâ opãturi wêrisome. Pekã me'epi neê wa'ãsome. Naâ Ô'ākî hi yeekãhasere, Jesu Cristo yeekãhasere da'rarã

niirāsama. Naâ mil ki'mari Cristo me'ra âpêrãre dutirāsama. Âpêrã pe'e yã'ará wêrî'kārã mil ki'mari yi'rîka be'ropi masarāsama.

⁷Mil ki'mari yi'rîka be'ro wãtiã wiôgi niî bahu dutí dihari peepi di'te kûú'kire pãão wîrorāsama. ⁸Kîî niî pe'tiro a'ti nukúkãkãharãre niî soosere êho peókã weegísami. Gogue, Magogue wamêtirã kê'rare meharóta weegísami. Naa yarã surárare a'mê wêhe dutigi neêo kúugísami. Naâ surára nukûpori pahirí maa diã sumútohokãhase weeró noho pâharã waro niirāsama. ⁹Naâ niî pe'tiro a'ti nukúkãpire se'sã ni'karāsama. Naâ Ô'ãkî hi yarã niirópi, tohó niikã kîi yaã maka kîî ma'irí makare sitiã ni'ka bi'arāsama. Ô'ãkî hi pe'e naâ tohó weekã ì'yãgi, naãre ì há kô'a dutigi pekã me'e o'ô dihogísami. Niî pe'tirã ì hi pe'tia wa'ãrāsama. ¹⁰Wãtiã wiôgi naãre niî soo'ki pekã me'e ì hirí ditarahopi kô'ã diho no'ogísami. Tii ditãra opê weeró noho bahusé me'ra sipí ì hi rosa'. Toopí yaí weeró noho bahugí, âpí niî soose kiti werê mi'tagi naâ piãrã kô'ã diho no'owã. Toopíre imî kohori, yamîri pi'etí nu'kurāsama. Neê wihásomê.

Butirí kumurohopi duhigí masá weesére besesé niî'

¹¹Be'ró, wiôgi duhirí kumuro butirí kumurohore ì'yãwi. Toopí duhigíre ì'yãwi. Kîî ì'yóropire a'tí di'ta, ì'mîse bahu dutí diha pe'tia wa'ãwi. Teé no'opí niiró bokatíwi. ¹²Be'ró, niî pe'tirã wêrî'kārã Ô'ãkî hi ì'yóropi nu'kuká ì'yãwi. Naâ no'ó niirã niîwã. Wiórã, mehó niirã niîwã. Naâ toó nu'kurí kura Ô'ãkî hi niî pe'tise masá we'êke ohã ô'o'ke pûrire pããwi. Ape pûrî katí nu'kuse kiorã naâ wameré ohã ô'o no'oka pûrire pããwi. Kîî wêrî'kãrãre a'tíro weewí. Naâ we'êke nikire tee pûrîpi ohã ô'o no'okaro nohota naãre keoró besé, bu'îri da'rêwí. ¹³Diã pakasé maari pakapi wêrî'kārã toopí niîwã. Di'tãpi wêrî'kārã kê'ra toopí niîwã. Niî pe'tirã naâ we'êkaro nohota niî pe'tisere keoró besé, bu'îri da'rê no'owã. ¹⁴Ô'ãkî hi masá naâ wêrisere kô'ã pe'okãwí. Naâ wêrî'kārã niiró kê'rare kô'ã pe'okãwí. Pekã me'ehopi bu'îri da'resé opãturi wêrisé weeró noho niî'. ¹⁵Niî pe'tirã naâ wameré katí nu'kuse kiorã ohã ô'o no'oka pûrîpi ohã ô'o no'oya marí'kārã pekã me'ehopi kô'ã diho no'owã.

Ape imí koho, apé di'ta dika yuú'ke niî'

21 Be'ró, yi'fí ape imí kohore, apé di'tare ì'yãwi. Too dipóro niî mi'ta'ke ì'mîse, di'tã bahu dutí diha pe'tia wa'ãwi. Diã pahirí maaho mariwí maha. ²Yi'fí João áyú butia'tri maka, ì'mîse Ô'ãkî hi tiropi niirí makare dihátikã ì'yãwi. Tii maká apé ma'ma maká Jerusalé niîwí. Áyuró apóka maka niîwí. Ni'kó numiô amúkã di'tegó marapíre áyuró ti'saáto niigo ma'mã su'a no'oko weeró noho niîwí. ³Be'ró ni'kí ì'mîsepi niigi tutuaró me'ra uúkukã ti'owí. A'tíro niîwí:

—Ti'oyá. Ô'ãkî hi masá me'ra niîmi. Naâ me'ra niî nu'kugísami. Naâ kîi yarã niirāsama. Kîî basita naâ me'ra niî, naâ wiôgi niigísami. ⁴Naâ ya'ko koóre tuu koégísami. Wêrisé marirósa'. Bihã wetise, utisé, pûrisé kê'ra marirósa' maha. Niî pe'tise too dipórokãhase pe'tiã wa'ãrosa', niîwí.

⁵Ô'ãkî hi wiôgi duhirí kumuropi duhigí a'tíro niîwí:

—Ti'oyá. Yi'fí niî pe'tise apêyere ma'mã di'akí dika yuú', niîwí.

Apêye niî nemowí:

—Yi'fí uúküsere ohãya. Teé diakí hí niise niî'. Yi'fí ni'karo nohota wa'ãrosa', niîwí.

⁶Be'ró a'tíro niîwí:

—Níŋ pe'tise tu'â eha ní'ko pe'o no'o'. Yi'íta níŋ mî'tagi, níŋ tiogipi níŋ'. No'ó yi'ŋ re ipítí iará ako wiórâ nohore yi'ŋ katí nu'kusere o'ógiti. Naäre wapa seésome. ⁷No'ó áyuro weé yi'ri wetirá êho peó du'utirá noho níŋ pe'tise yi'ŋ “O'ógiti” níŋ'kere yê'êrâsama. Yi'ŋ naâ wiôgi níŋgisa!. Naâ yi'ŋ pō'ra níŋrâsama. ⁸Âpêrâ pūrikâ uisé bu'iri yi'ŋ re êho peó du'urâ pekâ me'epi wa'ârâsama. Tohó níŋkâ êho peótirá, yâ'â butia'sere weerâ, wêhé kō'arâ toopí wa'ârâsama. Âpêrâ no'ó iaró a'me târâ baha ke'atirá, yaí weeró noho tí'ó yâ'a masirá pekâ me'epi wa'ârâsama. Tohó níŋkâ Ô'âkî hi mehereta êho peórâ, níŋ pe'tirá níŋ soose pihará pekâ me'epi wa'ârâsama. Tii ditára opê weeró noho bahusé sipî í hîsa!. Teé bu'iri da'resé opâturi wêrisé weeró noho níŋ'.

Ma'ma maká Jerusalé kâhase kiti níŋ'

⁹Be'ró ní'kí sô'ó níŋkârâ sete me'rakî hire í'yâwi. Naâta, naâ níŋi bu'iri da'rê tioatehe posetise paarire kiowá. Ní'kí naâ me'rakî hi a'tíro níŋwî:

—Te'á. Mî'ŋ re Ô'âkî hi maki ovelha wi'magí weeró noho bahugí nîmo níŋâkohore í'yogítí, níŋwî. Kîŋ nîmó Jesu Cristore êho peórâ níŋ sí'rîro weé'.

¹⁰Espírito Santo kê'esé weeró noho yi'ŋ re í'yowí. Ní'kí Ô'âkî hire werê ko'tegi írigí pahikihí í'miákihihopi yi'ŋ re miáawí. Toopí yi'ŋ re Ô'âkî hi tiro níŋka makaho dihátisere í'yowí. Tii maká Jerusalé yâ'asé moorí makaho níŋwî. ¹¹Tii maká Ô'âkî hi asistése me'ra pūúro asistewí. Í tâ peeri wapa bihíse peeri jaspe wamêtise peeri weeró noho asisté, akostíwi. ¹²Tii maká sumútoho pahírí sâ'rîro í'miári sâ'rîro níŋwî. Tíŋ sâ'rîropi doze soperi níŋwî. Tee soperi níŋi ní'karérâ Ô'âkî hire werê ko'terâ nu'kuwá. Tee soperipire Israel yee kurarikâharâ wamere ohâ ô'o no'owi. Naâ doze kurari níŋwâ. ¹³Tíŋ sâ'rîropire muhípū mihátiro pe'e í'tiá sope níŋwî. Muhípū sâháaro pe'ere í'tiá sope níŋwî. Kūúpe' pe'ere í'tiá sope níŋwî. Diakí hí pe'e kê'rare í'tiá sope níŋwî. ¹⁴Tii makákâha sâ'rîrore í'tapá paka me'ra tuú yê'e no'owi. Teepagá dozepaga níŋwî. Teepagá níŋi Jesu Cristo bese kúú'kârâ wamere ohâ ô'o no'owi.

¹⁵Ô'âkî hire werê ko'tegi yi'ŋ re úúkūgi ní'kâgi aríŋgi ouro me'ra weé'kire kiowí. Tigí me'ra tii makáre, soperire, tíŋ sâ'rîrore keogítigi weewí. ¹⁶Tii maká ba'pâritise pâ'reri meharóta bahuwí. Ní'kâro noho e'sá, ní'kâro noho yoáwi. Ô'âkî hire werê ko'tegi kîŋ keokihí me'ra tii makáre keowí. Tii maká yoaró dois mil duzentos quilômetros níŋwî. Í'miáro, e'saró kê'ra meharóta níŋwî. ¹⁷Be'ró sâ'rîrore keowí. Sessenta e cinco metros íse bitíwi. Masá keo wiáro noho keowí.

¹⁸Sâ'rîro ya'sasépa jaspe wamêtise me'ra weéka sâ'rîro níŋwî. Tii maká ouro waro me'ra weéka maka níŋwî. Ouro êo kuhíri ú'ŋri marisé weeró noho akostíwi. ¹⁹Í'tapagá tíŋ sâ'rîrore tuú yê'esepaga paka a'tíro weé no'owi. Níŋ pe'tise í'tâ peeri wapa bihíse peeri me'ra ma'mâ su'a no'owi. Níŋ mî'takaha ya'sasé peeri jaspe wamêtise peeri me'ra ma'mâ su'a no'owi. Be'rokâhá safira wamêtise ya'sasé peeri me'ra ma'mâ su'a no'owi. Be'rokâhá butí boo kuresse ágata wamêtise peeri me'ra ma'mâ su'a no'owi. Be'rokâhá ya'sasé esmeralda wamêtise peeri me'ra ma'mâ su'a no'owi. ²⁰Apêga sô'asé sardônica wamêtise peeri me'ra ma'mâ su'a no'owi. Be'rokâhá sô'â boo kuresse sárdio wamêtise peeri me'ra ma'mâ su'a no'owi. Be'rokâhá ewí boo kure crisólito wamêtise peeri me'ra ma'mâ su'a no'owi. Be'rokâhá ya'sasé berilo wamêtise peeri me'ra ma'mâ su'a no'owi. Be'rokâhá ewí boo kure akostíse topázio wamêtise peeri

me'ra ma'mâ su'a no'owi. Be'rokâhá ya'sâ boo kurese crisópraso wamêtise peeri me'ra ma'mâ su'a no'owi. Be'rokâhá ya'sasé jacinto wamêtise peeri me'ra ma'mâ su'a no'owi. Niî tiokahapia sô'à yîi boó kurese ametista wamêtise peeri me'ra ma'mâ su'a no'owi. ²¹ Doze soperi niîwi. Tee soperi niki ni'kâga pérolaho me'ra weé no'o'ke soperi niîwi. Makâ dekopî wa'arí ma'a ouro me'ra weéka ma'a niîwi. Êo kuhíri akostíro weeró noho bahuwí.

²² Tii makápire neê Ô'âkî hi wi'ire i'yâtiwi. A'tíro niî'. Ô'âkî hi marí wiôgi tutuâ yi'riagi toopí niîmi. Tohô niiká Ô'âkî hi maki ovelha wi'magi weeró noho bahugí kê'ra toopí niîmi. Tohô weéro Ô'âkî hi wi'i mariwí.

²³ Tii makápire muhîpû imî kohokî hi, yamîkî hi sî'óosere neê a'mâsome. Ô'âkî hi asistése me'ra âyuró sî'óo' nu'ku'. Ô'âkî hi maki ovelha wi'magi weeró noho bahugí kîî tii makáre sî'óo'gi niîmi. ²⁴ A'ti nukúkâkâharâ Ô'âkî hi yi'rió no'o'kârâ tii maká sî'óo'se me'ra sihârasama. A'ti nukúkâkâharâ wiôrá naâ wiôrá niî'kere tii makápi miáarásama. ²⁵ Toopíre yamí marirósa'. Tohô weéro tii makákâhase soperi susú nu'kukâ'rosa'.

²⁶ A'ti nukúkâkâharâ naâ âyusé niiséti'kere tii makápi miáarásama.

²⁷ Toopíre neê ni'kâti yâ'asé mii sâhá no'oya marirósa'. Yâ'âro weerá, niî soose bikirá toopíre neê sâháasome. Ô'âkî hi maki ovelha wi'magi weeró noho bahugí yaa pûri katí nu'kuse kiorâ naâ wameré ohâ ô'o no'o'kârâ di'akî sâháarásama.

22 Be'ró Ô'âkî hire werê ko'tegi diâre i'yowí. Tii maá û'íri marirí maa niîwi. Teé akó, katisé warore o'ôwi. Pûúro akostíri maa niîwi. Ô'âkî hi, tohô niiká kîî makí ovelha wi'magi weeró noho bahugí duhirí kumuro dokapi wihawí. ² Tii maká deko wa'arí ma'api a'mâ bírowi. Diâ pí a pe'eseri sumútoho yukí katisé o'osé pí'riwí. Ni'kâ ki'mare dozetiri dikâtiwi. Muhîpûri niki dikâtiwi. Tigikâháse pûri masaré akô yeese niîwi. ³ Toopíre "Masá yâ'âro weé'ke wapa naâre yâ'âro wa'ârosa'", niîya marirósa'. Tii makápire Ô'âkî hi, tohô niiká kîî makí ovelha wi'magi weeró noho bahugí duhirí kumuro niírosa'. Kîî yarâ kîîre êho peórásama. ⁴ Bahú yoaropi kîîre i'yârasama. Naâ diâpoapi kîî wameré kiorásama. ⁵ Toopí yamí marirósa'. Toopí niirâ neê sî'óo'sere iasomé. Muhîpû bo'rê yuuseré iasomé. Ô'âkî hi marí wiôgi sî'óo'gisami. Naâ toopí niirâ Ô'âkî hi me'ra dutí tamu nu'kurásama.

Jesu Cristo maatá a'tígisami niisé kiti niî'

⁶ Be'ró Ô'âkî hire werê ko'tegi yi'íre niîwi:

—A'té uúkuse diakí hí niisé niî'. Teé niî'karo nohota wa'ârosa'. Marí wiôgi Ô'âkî hi kîî werê duti'kere werê turiaräre wâkusé o'ôwi. Kîîta kîîre werê ko'tegíre o'ôo'wí. Kîî yarâre maatá be'ropí wa'aáthehe i'yo dutígi tohô weewí.

⁷ A'tíro niîwi:

—Maatá a'tígiti. A'ti turípi ohâ'kere êho peó yi'tigí noho e'katígisami, niîwi.

⁸ Yi'í João a'té niî pe'tisere i'yâwi. Niî pe'tisere tí'owí. Teeré tí'ó, i'yâka be'ró Ô'âkî hire werê ko'tegi yi'íre i'yó'ki tiro êho peógi ehâ ke'awi. ⁹ Kîî pe'e tohô weeká i'yâgi, niîwi:

—Tohô weetíkâ'ya. Yi'í kê'ra kîîre da'râ ko'tegita niî'. Yi'í mi'í weeró noho niigí niî'. Mi'í akawerérâ Ô'âkî hi werê duti'kere werê turiarâ weeró noho niî'. Tohô niiká yi'í niî pe'tirá a'ti pûrípi ohâ'kere êho peó yi'tirá weeró noho niî'. Yi'íre êho peótikâ'ya. Ô'âkî hi pe'ere êho peóya, niîwi.

¹⁰Kĩĩ yi'ĩ re nĩ nemowĩ:

—A'ti pũrĩpi “A'tĩro wa'ãrosa” nĩ ohã'ke keoró wa'aátehe kã'ró d'ĩ'sá'!

Tohó weegĩ a'ti pũrĩpi ohã'kere Ô'ãkĩ hi yee kitire ya'yióropi kiótikã'ya.

¹¹Kã'ró d'ĩ'sá'! Yã'agĩ meharóta kĩĩ iaró weé bata'ato. Yã'ã butia'sere weegĩ kē'ra meharóta weé bata'ato. Ayugĩ pũrikã ayuró weé nu'kuato. Tohó niikã Ô'ãkĩ hi iaró weé nu'kugi kĩĩ re keoró wee sirú tuuato, niĩwĩ.

¹²Be'ró Jesu a'tĩro niĩwĩ:

—Tohóta niĩ'! Maatã a'tĩgisa'! Yi'ĩ masaré o'oátehere kió'! Naã niki naã keoró weé'kere o'ógiti. ¹³Yi'ĩta nĩ mi'tagi, nĩ tiogipi niĩ'!

¹⁴No'ó su'tiré koé'kãrã weeró noho ayurã nĩ si'rĩrã naã yã'ãro weé'kere du'úrã, e'katĩrãsama. Naã katisé o'okihĩ dikare ba'ã masirãsama. Naã a'ti makã ayũ butia'ri makapi sãháa masirãsama. ¹⁵Apêrã pũrikã yã'ãro weerã tii makãpire sãháasome. Yã'ã butia'ro weerã, yaĩ weeró noho ti'ó yã'a masirã tii makãpire sãháasome. Tohó niikã no'ó iaró yã'ãro a'me tãrã baha ke'atirã, wêhé kó'arã sãháasome. Apêrã Ô'ãkĩ hi mehereta êho peórã noho, tohó niikã nĩ soosere weé ti'sarã noho sãháasome.

¹⁶Yi'ĩ Jesu niĩ'! Ô'ãkĩ hire werê ko'tegi, yagĩ me'ra a'ti pũrikãhase nĩ pe'tirã yi'ĩ re êho peóse kurarikãharãre werê duti'! Yi'ĩ diporókĩ hi wiôgi Davi paramĩ nĩ turiagi niĩ'! Tohó niikã yókoáwĩ bo'rêa mihatiri kura asisté mihatigi weeró noho niigĩ niĩ', niĩwĩ Jesu.

¹⁷Kĩĩ tohó niika be'ro Espĩrito Santo, tohó niikã Jesu Cristore êho peórã a'tĩro niĩwã:

—A'ti bakeo'ya, niĩwã.

No'ó a'teré ti'orã noho kē'ra “A'tiãto”, niĩãto.

No'ó ako wiórã si'rĩ si'rĩrã noho a'tiãto. Akó katisé warore o'osére si'rĩrã a'tiãto. Teé neê wapa marĩrosa'!

¹⁸Niĩ pe'tirã Ô'ãkĩ hi yee kitire a'ti pũrĩpi ohã'kere ti'orãre a'tĩro nĩ werê yuugiti. No'ó a'ti pũrĩpi ohã'kere ohã yi'riogĩ nohore Ô'ãkĩ hi bu'ĩri da'rêgisami. A'ti pũrĩpi bu'ĩri da'resére ohã'ke nohoreta kĩĩ re weegĩsami. ¹⁹No'ó a'ti pũrĩpi ohã'kere d'ĩ'agĩ nohore Ô'ãkĩ hi a'tĩro weegĩsami. Kĩĩ ohã d'ĩ'a'karo nohota Ô'ãkĩ hi katĩ nu'kuse kiorã ohã o'ó no'oka pũripire kĩĩ wameré koegĩsami. Kĩĩ yukĩ gi katisé o'okihĩ dikare ba'ãsome. Kĩĩ tii makã ayurĩ makare sãháasome. A'te kitire a'ti pũripire ohã no'ó.

²⁰Jesu Cristo a'teré werêgi, a'tĩro niĩmi:

—Tohóta niĩ'! Kã'roákã d'ĩ'sá' yi'ĩ dihátiatoho, niĩmi.

Tohóta wa'ãrosa'! Wiôgi Jesu, keêro a'ti bakeo'ya. ²¹Marĩ wiôgi Jesu Cristo misã nĩ pe'tirãre ayuró weeãto. Tohóta weeãto.